

ЎЗБЕКИСТОН РЕСПУБЛИКАСИ
ҚОНУН ҲУЖЖАТЛАРИ
ТЎПЛАМИ

42-сон
(126)
2004 й.
октябрь

Ўзбекистон Республикаси Қонун ҳужжатлари тўплами беш бўлимдан иборат:

тўпламнинг биринчи бўлимида Ўзбекистон Республикаси қонунлари ва Олий Мажлиснинг қарорлари эълон қилинади;

иккинчи бўлимда Ўзбекистон Республикаси Президентининг фармон ва фармойишлари эълон қилинади;

учинчи бўлимда Вазирлар Маҳкамасининг қарор ва фармойишлари эълон қилинади;

тўртинчи бўлимда Ўзбекистон Республикаси Конституциявий судининг қарорлари эълон қилинади;

тўпламнинг бешинчи бўлимида вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.

МУНДАРИЖА

Иккинчи бўлим

445. «Ўзбекистон Республикаси Ер ресурслари, геодезия, картография ва давлат кадастри давлат қўмитасини ташкил қилиш тўғрисида» Ўзбекистон Республикаси Президентининг 2004 йил 15 октябрдаги ПФ-3502-сон Фармони

Учинчи бўлим

446. «Ўзбекистон Республикаси Ер ресурслари, геодезия, картография ва давлат кадастри давлат қўмитаси фаолиятини ташкил этиш тўғрисида» Ўзбекистон Республикаси Вазирлар Маҳкамасининг 2004 йил 19 октябрдаги 483-сон қарори

447. «Бюджетдан ташқари Пенсия жамғармасини бошқаришни янада такомиллаштириш тўғрисида» Ўзбекистон Республикаси Вазирлар Маҳкамасининг 2004 йил 21 октябрдаги 490-сон қарори

Бешинчи бўлим

449. «Қорақалпоғистон Республикаси бюджети ва маҳаллий бюджетларда назарда тутилган режали йиллик даромадлар ва харажатлар ҳажмларининг чораклик

тақсимотини тузиш, бюджетни ижро этиш жараёнида киритиладиган ўзгартиришларни ҳисобга олиш, бюджетда назарда тутилган ташкилотлар ва тадбирларни молиялаштириш тартиби тўғрисидаги йўриқномага ўзгартириш ва қўшимчалар киритиш ҳақида» Ўзбекистон Республикаси Молия вазирининг 2004 йил 12 октябрдаги 111-сон буйруғи. (*Ўзбекистон Республикаси Адлия вазирлиги томонидан 2004 йил 20 октябрда 1025-2-сон билан давлат рўйхатидан ўтказилди*)

450. «Ўзбекистон Республикаси ҳудудда банкларда электрон ахборотларни муҳофазалашни ташкил этиш тўғрисидаги йўриқномага қўшимчалар киритиш ҳақида» Ўзбекистон Республикаси Марказий банки Бошқарувининг 2004 йил 2 октябрдаги 21/10-сон қарори. (*Ўзбекистон Республикаси Адлия вазирлиги томонидан 2004 йил 22 октябрда 1047-1-сон билан давлат рўйхатидан ўтказилди*)

Вазирликлар, давлат қўмиталари ва идораларининг умумий мажбурий тусдаги меъёрий ҳужжатларини давлат рўйхатидан ўтказиш ҳолати тўғрисида 2004 йил 16 октябрдан 22 октябргача бўлган маълумот

ИККИНЧИ БЎЛИМ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

445 Ўзбекистон Республикаси Ер ресурслари, геодезия, картография ва давлат кадастри давлат қўмитасини ташкил қилиш тўғрисида

Ўзбекистон Республикаси Президентининг «Республика давлат бошқаруви органлари тизимини такомиллаштириш тўғрисида» 2003 йил 9 декабрдаги ПФ–3358-сон Фармонида мувофиқ ҳамда ердан фойдаланиш, геодезия ва картография соҳасидаги бошқарув тизимини янада такомиллаштириш, ердан оқилона фойдаланишни таъминлаш ва ер муносабатларини тартибга солиш, Давлат кадастрлари ягона тизимини юритиш мақсадида:

1. Ўзбекистон Республикаси Ер ресурслари давлат қўмитаси ҳамда Ўзбекистон Республикаси Вазирлар Маҳкамаси ҳузуридаги Геодезия, картография ва давлат кадастри Бош бошқармаси тугатилиб, уларнинг негизида Ўзбекистон Республикаси Ер ресурслари, геодезия, картография ва давлат кадастри давлат қўмитаси (Ўздавергеодезкадастр) ташкил қилинсин.

2. Қуйидагилар Ўздавергеодезкадастр қўмитасининг асосий вазифалари этиб белгилансин:

ердан оқилона фойдаланиш ва муҳофаза қилиш бўйича ягона давлат сиёсати амалга оширилишини таъминлаш;

ердан оқилона фойдаланиш ва муҳофаза қилиш устидан давлат назоратини амалга ошириш;

тупроқ унумдорлигини ошириш, ердан оқилона фойдаланиш ва муҳофаза қилиш бўйича давлат дастурларини ишлаб чиқиш ҳамда амалга ошириш;

геодезия ва картография соҳасидаги фаолиятни бошқариш;

давлат геодезия назоратини ташкил қилиш;

жойларда давлат бошқаруви органлари ва давлат ҳокимияти органларининг давлат кадастрларини юритиш соҳасидаги фаолиятини мувофиқлаштириш;

давлат ер кадастрини, давлат картография-геодезия кадастрини, бинолар ва иншоотлар давлат кадастрини, шунингдек Давлат кадастрлари ягона тизимини юритиш.

3. Белгилансинки, Ўздавергеодезкадастр қўмитаси Ўзбекистон Республикаси Ер ресурслари давлат қўмитаси ҳамда Ўзбекистон Республикаси Вазирлар Маҳкамаси ҳузуридаги геодезия, картография ва давлат кадастри Бош бошқармасининг шартномалари ва мажбуриятлари бўйича ҳуқуқий ворис ҳисобланади.

4. Давлат бюджети маблағлари ҳисобига бажариладиган ер-кадастр, ер тузилиши, тупроқ ва геоботаника соҳасидаги ишлар қўшилган қиймат солиғини тўлашдан озод этилиши белгилаб қўйилсин.

5. «Ўзбекистон Республикаси Ер ресурслари давлат қўмитасини ташкил этиш тўғрисида» Ўзбекистон Республикаси Президентининг 1998 йил 24 июлдаги ПФ–2059-сон Фармони ўз кучини йўқотган деб ҳисоблансин.

6. Ўзбекистон Республикаси Вазирлар Маҳкамаси бир ҳафта муддатда Ўзбекис-

тон Республикаси Ер ресурслари, геодезия, картография ва давлат кадастри давлат қўмитаси фаолиятини ташкил этиш юзасидан қарор қабул қилсин.

7. Ушбу Фармоннинг ижросини назорат қилиш Ўзбекистон Республикаси Бош вазири Ш.М. Мирзиёев зиммасига юклатилсин.

Ўзбекистон Республикаси Президенти И. КАРИМОВ

Тошкент ш.,
2004 йил 15 октябрь,
ПФ-3502-сон

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

446 Ўзбекистон Республикаси Ер ресурслари, геодезия, картография ва давлат кадастри давлат қўмитаси фаолиятини ташкил этиш тўғрисида

Ўзбекистон Республикаси Президентининг «Ўзбекистон Республикаси Ер ресурслари, геодезия, картография ва давлат кадастри давлат қўмитасини ташкил этиш тўғрисида» 2004 йил 15 октябрдаги ПФ–3502-сон Фармони бажариш юзасидан Вазирлар Маҳкамаси **қарор қилади:**

1. Куйидагилар:

Ўзбекистон Республикаси Ер ресурслари, геодезия, картография ва давлат кадастри давлат қўмитаси («Ергеодезкадастр» давлат қўмитаси) таркибига кирувчи ташкилотлар рўйхати 1-иловага мувофиқ;

«Ергеодезкадастр» давлат қўмитасининг ходимларнинг чекланган умумий сони 63 нафар, шу жумладан бошқарув ходимлари сони 43 нафар бўлган марказий аппарати тузилмаси 2-иловага мувофиқ;

Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармаларининг намунавий тузилмаси ва ходимларнинг чекланган сони 3 ва За*-иловаларга мувофиқ;

туман (шаҳар) ер ресурслари ва давлат кадастри бўлимининг намунавий тузилмаси 4-иловага* мувофиқ;

Ўзбекистон Республикаси Ер ресурслари, геодезия, картография ва давлат кадастри давлат қўмитаси тўғрисидаги низом 5-иловага мувофиқ тасдиқлансин.

«Ергеодезкадастр» давлат қўмитаси раисига, зарурат бўлганда, марказий аппарат тузилмасига ходимларнинг белгиланган умумий сони доирасида ўзгартиришлар киритиш ҳуқуқи берилсин.

2. Белгилансинки:

Қорақалпоғистон Республикаси ҳамда вилоятлар ер ресурслари ва давлат кадастри бошқармалари тегишли равишда Қорақалпоғистон Республикаси ҳамда вилоятлар ер ресурслари бошқармалари, ер, бинолар ва иншоотлар давлат кадастри бош бошқармалари, техник хатловдан ўтказиш кадастр бюrolари негизида ташкил этилади;

Тошкент шаҳар ер ресурслари ва давлат кадастри бошқармаси Тошкент шаҳар ер муносабатларини тартибга солиш ва қўчмас мулк кадастри бош бошқармаси ҳамда яқка тартибдаги уй-жойларни ҳисобга олиш ва назорат қилиш бошқармаси негизида ташкил этилади;

туманлар (шаҳарлар) ер ресурслари ва давлат кадастри бўлимлари тегишли равишда туманлар (шаҳарлар) ер ресурслари хизматлари, қўчмас мулк кадастри хизматлари ва техник хатловдан ўтказиш кадастр бюrolари негизида ташкил этилади.

* За, 4-иловалар берилмайди.

3. «Картография» илмий-ишлаб чиқариш бирлашмаси негизида «Картография» давлат илмий-ишлаб чиқариш корхонаси ташкил этилсин, тегишли равишда «Ўздаверлойиҳа» илмий-лойиҳалаш институти ҳамда Геодезия назорати давлат инспекцияси таркибидан чиқариладиган «Агрохарита» картография фабрикаси ва Давлат картография-геодезия фонди унинг таркибига берилсин.

4. Ўзбекистон Республикаси Геодезия назорати давлат инспекцияси Ўзбекистон Республикаси Ер ресурслари, геодезия, картография ва давлат кадастри давлат қўмитаси ҳузуридаги Давлат геодезия назорати инспекциясига айлантирилсин.

5. Техник хатловдан ўтказиш республика кадастр бюроси ҳамда Хўжалик ҳисобидаги республика кўчмас мулк кадастри хизмати, «Ер-сервис» илмий-техника маркази, «Геотехника» давлат унитар корхонаси тугатилсин, уларнинг функциялари ва мол-мулки белгиланган тартибда «Ергеодезкадастр» давлат қўмитасига берилсин.

«Ергеодезкадастр» давлат қўмитаси Ўзбекистон Республикаси Давлат мулк қўмитаси билан биргаликда кўрсатиб ўтилган тузилмаларни тугатиш билан боғлиқ тадбирларни белгиланган тартибда амалга оширсин.

6. «Ергеодезкадастр» давлат қўмитаси, Ўзбекистон Республикаси Давлат мулк қўмитаси Андижон, Бухоро, Жиззах ва Навоий вилоятлари ҳокимликлари билан биргаликда бир ой муддатда Андижон, Бухоро, Жиззах, Навоий шаҳарларининг, Гиждувон ва Қорақўл туманларининг илгари хусусийлаштирилган техник хатловдан ўтказиш кадастр бюроларининг архивлари белгиланган тартибда «Ергеодезкадастр» давлат қўмитасининг тегишли бўлинмаларига берилишини таъминласинлар.

7. «Ергеодезкадастр» давлат қўмитасини ташкил этиш билан боғлиқ ташкилий-техник масалаларни ҳал этиш ва унинг раҳбар ходимларини, ҳудудий бўлинмалар ҳамда Қўмитага қарашли тузилмалар раҳбарларини аттестациядан ўтказиш бўйича Республика комиссияси 6-иловага* мувофиқ таркибда ташкил этилсин.

Республика комиссияси (Ш.М. Мирзиёев) Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда икки ой муддатда:

«Ергеодезкадастр» давлат қўмитасини ташкил этиш билан боғлиқ барча зарур ташкилий-техник тадбирлар амалга оширилишини;

ҳудудий бўлинмаларнинг ташкилий тузилмаси мазкур қарорга мувофиқлаштирилишини;

бўшаб қолаётган ходимларни ишга жойлаштириш бўйича белгиланган тартибда чора-тадбирлар кўрилишини;

«Ергеодезкадастр» давлат қўмитаси марказий аппарати раҳбар ходимлари, ҳудудий бўлинмалар ва Қўмитага қарашли тузилмалар раҳбарлари аттестациядан ўтказилишини таъминласин.

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари ҳузурида ана шундай ҳудудий комиссиялар ташкил этилсин.

8. «Ергеодезкадастр» давлат қўмитаси бир ой муддатда:

Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари тўғрисидаги низомларни тасдиқласин;

моддий-техник базани хатловдан ўтказсин, «Ергеодезкадастр» давлат қўмитаси ҳудудий бўлинмаларини техник жиҳатдан қайта жиҳозлаш дастурини ишлаб чиқсин ва тасдиқласин;

Ўзбекистон Республикаси Ер ресурслари, геодезия, картография ва давлат кадастри давлат қўмитаси ҳузуридаги Давлат геодезия назорати инспекцияси тўғрисидаги низом, (суғориладиган экин майдонларининг оборотдан чиқиб кетишига йўл

* 6-илова берилмайди.

қўймасликка алоҳида эътибор берган ҳолда) Ердан фойдаланиш ва уни муҳофаза қилиш устидан давлат назорати тўғрисидаги низом, янги таҳрирдаги Давлат кадастрлари ягона тизимини яратиш ва юритиш тартиби тўғрисидаги низом лойиҳаларини тасдиқлаш учун Вазирлар Маҳкамасига киритсин;

Ўзбекистон Республикаси «Давархитектқурилиш» қўмитаси билан келишган ҳолда «Ергеодезкадастр» давлат қўмитасига қарашли ташкилотлар томонидан бажариладиган лойиҳа-қидирув ва ер тузиш ишлари қийматини шартномавий, жорий нархларда аниқлашнинг янги тартибини ишлаб чиқсин ва тасдиқласин, бунда бажариладиган ишлар (хизматлар) қийматини геодезия, картография, топография, ер тузиш, кадастр ва баҳолаш ишларини амалга оширишнинг замонавий технологияларини жорий этиш ҳисобига пасайтиришни назарда тутсин.

9. Ўзбекистон Республикаси Давлат статистика қўмитаси «Ергеодезкадастр» давлат қўмитаси билан биргаликда икки ой муддатда республиканинг барча ҳудудда ерларнинг миқдори ва улардан фойдаланилиши тўғрисидаги ҳисоботлар шакллари қайта кўриб чиқсин ҳамда белгиланган тартибда янги ягона ҳисобот шакллари тасдиқласин.

10. Ўзбекистон Республикаси Ер ресурслари давлат қўмитаси ҳамда Ўзбекистон Республикаси Вазирлар Маҳкамаси ҳузуридаги Геодезия, картография ва давлат кадастри бош бошқармаси илгари эгаллаб турган хизмат бинолари ва хоналари «Ергеодезкадастр» давлат қўмитаси ва унга қарашли ташкилотлар ихтиёрида қолдирилсин.

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Қорақалпоғистон Республикаси, вилоятлар ҳамда Тошкент шаҳар ер ресурслари ва давлат кадастри бошқармаларини, туманлар (шаҳарлар) ер ресурслари ва давлат кадастри бўлимларини бинолар, жиҳозлар ва телефон алоқаси билан таъминласинлар.

11. Ўзбекистон Республикаси Ҳукуматининг 7-иловага мувофиқ айрим қарорлари ўз кучини йўқотган деб ҳисоблансин ҳамда баъзиларига ўзгартириш ва қўшимчалар киритилсин.

Вазирликлар ва идоралар бир ой муддатда ўз норматив ҳужжатларини мазкур қарорга мувофиқлаштирсинлар.

12. Мазкур қарорнинг бажарилишини назорат қилиш Ўзбекистон Республикасининг Бош вазири Ш.М. Мирзиёев зиммасига юклансин.

Вазирлар Маҳкамасининг Раиси И. КАРИМОВ


Тошкент ш.,
2004 йил 19 октябрь,
483-сон

Вазирлар Маҳкамасининг
2004 йил 19 октябрдаги 483-сон қарорига
1-ИЛОВА


**Ўзбекистон Республикаси Ер ресурслари, геодезия,
картография ва давлат кадастри давлат қўмитаси
(«Ергеодезкадастр» давлат қўмитаси) таркибига кирувчи
корхоналар ва ташкилотлар рўйхати**

1. Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари
2. Туманлар (шаҳарлар) ер ресурслари ва давлат кадастри бўлимлари
3. Давлат геодезия назорати инспекцияси
4. Марказий аэрогеодезия корхонаси
5. Самарқанд аэрогеодезия корхонаси
6. «Картография» давлат илмий-лойиҳалаш корхонаси
7. Геодезия ва картография миллий маркази
8. Тупроқшунослик ва агрокимё давлат илмий-тадқиқот институти
9. Ўзбек давлат ер тузиш илмий-лойиҳалаш институти «Ўздаверлойиҳа»
10. «Геоинформкадастр» давлат унитар корхонаси

Ўзбекистон Республикаси Ер ресурслари, геодезия, картография ва давлат кадастри давлат қўмитаси марказий аппаратининг тузилмаси



**Қорақалпоғистон Республикаси, вилоятлар ва Тошкент шаҳар ер ресурслари
ва давлат кадастри бошқармаларининг намунавий тузилмаси**



Вазирлар Маҳкамасининг
2004 йил 19 октябрдаги 483-сон қарорига
5-ИЛОВА

Ўзбекистон Республикаси Ер ресурслари, геодезия, картография ва давлат кадастри давлат қўмитаси тўғрисида НИЗОМ

I. Умумий қоидалар

1. Ўзбекистон Республикаси Ер ресурслари, геодезия, картография ва давлат кадастри давлат қўмитаси (кейинги ўринларда «Ергеодезкадастр» давлат қўмитаси деб аталади) давлат бошқарув органи ҳисобланади.

«Ергеодезкадастр» давлат қўмитаси ўз фаолияти тўғрисида Ўзбекистон Республикаси Вазирлар Маҳкамасига ҳисобот беради.

2. «Ергеодезкадастр» давлат қўмитаси тизимига Қорақалпоғистон Республикаси, вилоятлар ҳамда Тошкент шаҳар ер ресурслари ва давлат кадастри бошқармалари, туманлар (шаҳарлар) ер ресурслари ва давлат кадастри бўлимлари, Давлат геодезия назорати инспекцияси, Марказий ва Самарқанд аэрогеодезия корхоналари, Геодезия ва картография миллий маркази, «Картография» давлат илмий-лойиҳалаш корхонаси, Ўзбек давлат ер тузиш илмий-лойиҳалаш институти — «Ўздавер-лойиҳа», Тупроқшунослик ва агрокимё давлат илмий-тадқиқот институти, «Геоинформкадастр» давлат унитар корхонаси қиради.

Худудий бўлинмалар «Ергеодезкадастр» давлат қўмитасига бўйсунди ва тегишли маҳаллий давлат ҳокимияти органига ҳисобот беради.

3. «Ергеодезкадастр» давлат қўмитаси ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси қарорлари ва бошқа ҳужжатларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, шунингдек ушбу Низомга амал қилади.

4. «Ергеодезкадастр» давлат қўмитаси ўз фаолиятини давлат бошқаруви бошқа органлари, маҳаллий давлат ҳокимияти органлари, жамоат бирлашмалари ва бошқа ташкилотлар билан ўзаро ҳамкорликда амалга оширади.

5. «Ергеодезкадастр» давлат қўмитаси ва унинг худудий бўлинмаларининг моддий-техника таъминоти, шунингдек ходимлари меҳнатига ҳақ тўлаш ажратиладиган маблағлар доирасида давлат бюджети маблағлари, шунингдек қонун ҳужжатларида тақиқланмаган бошқа манбалар ҳисобига амалга оширилади.

6. «Ергеодезкадастр» давлат қўмитаси, унинг худудий бўлинмалари, унга идоравий мансуб бошқа органлар, корхоналар ва муассасалар юридик шахс ҳисобланади, Ўзбекистон Республикаси Давлат герби тасвири туширилган ва ўз номи ёзилган муҳрга эга бўлади.

II. «Ергеодезкадастр» давлат қўмитасининг вазифалари ва функциялари

7. Қуйидагилар «Ергеодезкадастр» давлат қўмитасининг асосий вазифалари ҳисобланади:

ер ресурсларидан оқилона фойдаланиш, ер муносабатларини тартибга солиш, ер тузишни ва ерлар мониторингини ташкил қилиш, тупроқ унумдорлигини сақ-

лаш, ошириш ва қайта тиклаш бўйича ягона давлат сиёсати амалга оширилишини таъминлаш;

тупроқ унумдорлигини ошириш, ерлардан оқилона фойдаланиш ва уларни муҳофаза қилишга доир давлат дастурларини ишлаб чиқиш ва амалга ошириш;

ерлардан оқилона фойдаланилиши ва улар муҳофаза қилиниши устидан давлат назоратини амалга ошириш;

геодезия ва картография фаолиятини бошқариш;

давлат геодезия назоратини ташкил этиш;

давлат бошқаруви органлари ва маҳаллий давлат ҳокимияти органларининг давлат кадастрларини юритиш соҳасидаги фаолиятини мувофиқлаштириш;

давлат ер кадастрини, давлат картография-геодезия кадастрини, бинолар ва иншоотлар давлат кадастрини, шунингдек Давлат кадастрлари ягона тизимини юритиш.

8. «Ергеодезкадастр» давлат қўмитаси ўзига юкланган вазифаларни бажариш учун қуйидаги функцияларни амалга оширади:

а) ердан фойдаланиш соҳасида:

ерга оид муносабатларни тартибга солиш тизимини такомиллаштиришга, ерлардан оқилона фойдаланиш ва уларни муҳофаза қилишга йўналтирилган ягона давлат сиёсати амалга оширилишини таъминлайди;

давлат бошқаруви органларининг, юридик ва жисмоний шахсларнинг ерлардан фойдаланиш, тупроқ унумдорлигини сақлаш, оширишни таъминлаш соҳасидаги фаолиятини мувофиқлаштиради;

ер тузиш, ерлардан фойдаланиш ва уларни муҳофаза қилишни, ер ресурсларини ҳисобга олиш ва баҳолашни такомиллаштиришга йўналтирилган чора-тадбирлар комплексини ишлаб чиқади ва амалга оширади;

ерлардан фойдаланиш ва уларни муҳофаза қилиш, юридик ва жисмоний шахслар, давлат бошқаруви органлари, маҳаллий давлат ҳокимияти органлари томонидан ер тўғрисидаги қонун ҳужжатлари талабларига риоя этилиши устидан давлат назоратини ташкил қилади ва амалга оширади, йўл қўйилган қонун бузилишларини бартараф этиш ва айбдор шахсларни жавобгарликка тортиш бўйича ўз вақтида чора-тадбирлар қўрилишини таъминлайди;

ер фондининг ҳолатини кузатиш, ўзгаришларни ўз вақтида аниқлаш, салбий жараёнларнинг олдини олиш ва оқибатларини тугатиш мақсадида ерлар мониторингини амалга оширади;

маҳаллий давлат ҳокимияти органлари билан биргаликда тупроқ унумдорлигини ошириш, ерлардан оқилона фойдаланиш ва уларни муҳофаза қилиш бўйича давлат дастурларини ишлаб чиқади ва амалга оширади;

Ер ресурсларининг ҳолати тўғрисида ҳар йилги Миллий ҳисоботни тузади.

б) геодезия ва картография фаолияти соҳасида:

давлат геодезия тармоғини яратади, ривожлантиради ва иш ҳолатида сақлайди;

давлат мақсадидаги ҳамда махсус мақсаддаги график, рақамли, фотосуратли ва бошқа шакллардаги топография хариталари ва планларини яратади, янгилайди ва нашр қилади;

Ерни масофадан зондлашни ва геодинамик тадқиқотларни амалга оширади;

умумжумҳурий, сиёсий-маъмурий, илмий-маълумотнома ва бошқа мавзули хариталарни ҳамда тармоқлараро мақсаддаги атласларни, ўқув картография қўлланиларини тузади ва нашр қилади;

давлат мақсадидаги ва махсус мақсаддаги жуғрофий ахборот тизимларини яратиши ва юритади;

Ўзбекистон Республикаси Давлат чегараси чизиқларини делимитация, демаркация қилишни ва текширишни геодезия, картография ва гидрография жиҳатидан таъминлашни ташкил қилади;

геодезия, картография ва кадастр ишларини метрология жиҳатидан таъминлашни ташкил қилади;

геодезия ва картография фаолиятини мувофиқлаштиради ва тартибга солади;

давлат геодезия назоратини амалга оширади;

давлат картография-геодезия фондини шакллантиради ва юритади;

жуғрофий номлар стандартлаштирилишини, ҳисобга олинишини ва уларни қўллаш тартибга солинишини таъминлайди;

илмий-тадқиқот, тажриба-конструкторлик ва тажриба-технология ишларини бажаради, норматив-техник ҳужжатларни ишлаб чиқади, геодезия ва картография асбоб-ускуналари ишлаб чиқаришни ташкил қилади;

иктисодиёт тармоқларини, фан, муҳофаа ва аҳолини геодезия, картография ахборотлари билан таъминлайди;

геодезия ва картография фаолияти лицензияланишини ташкил қилади;

в) давлат кадастрини юритиш соҳасида:

давлат бошқаруви органлари ва маҳаллий давлат ҳокимияти органларининг давлат кадастрларини юритиш соҳасидаги фаолиятини мувофиқлаштиради;

Давлат кадастрлари ягона тизимига киритиладиган тармоқ кадастр ахборотларини йиғиш, таҳлил қилиш, туркумлаш, сақлаш ва янгилашни амалга оширади;

давлат ер кадастрини юритади;

бинолар ва иншоотларнинг давлат кадастрини юритади;

давлат картография-геодезия кадастрини юритади;

илмий-тадқиқот ва тажриба-технология ишларини бажаради, норматив-техник ҳужжатларни ишлаб чиқади ва тасдиқлайди;

вилоятлар, туманлар ва аҳоли пунктларининг маъмурий чегараларини белгилаш (аниқлаш) ишларини ташкил қилади ва амалга оширади;

фойдаланувчиларни кадастр ахборотлари билан таъминлайди;

г) кўчмас мулкка ҳуқуқларни давлат рўйхатидан ўтказиш соҳасида:

кўчмас мулкка ҳуқуқларни ва кўчмас мулкка доир битишувларни давлат рўйхатидан ўтказишни амалга оширади;

кўчмас мулкка ҳуқуқлар, уларнинг бир ҳуқуқ эгасидан иккинчисига ўтиши тўғрисидаги, кўчмас мулкка ҳуқуқларни чегаралаш ва кўчмас мулкка доир бошқа битишувлар тўғрисидаги маълумотлар банкни ташкил қилади.

9. «Ергеодезкадастр» давлат қўмитаси ўзига юкланган вазифалар ва функцияларни бевосита, шунингдек ўзининг ҳудудий бўлинмалари, бошқа идоравий мансуб органлар ва муассасалар орқали ҳал қилади.

**III. «Ергеодезкадастр» давлат қўмитасининг ҳуқуқлари
ва жавобгарлиги**

10. «Ергеодезкадастр» давлат қўмитаси ўзига юкланган вазифалар ва функцияларни бажариш учун қуйидаги ҳуқуқларга эга:

давлат бошқаруви органлари ва маҳаллий давлат ҳокимияти органларидан ўзига юкланган вазифаларни бажариш учун зарур бўлган ахборотларни сўраш ва текин олиш;

кадастр маълумотларига мувофиқлигини аниқлаш учун тупрокни текшириш;
хайъат мажлисларида давлат бошқаруви органлари, корхоналар, ташкилотлар ва муассасалар раҳбарларининг «Ергеодезкадастр» давлат қўмитаси ваколатига киритилган масалалар бўйича ҳисоботларини эшитиш;

ерлардан оқилона фойдаланиш ва уларни муҳофаза қилиш масалалари бўйича текширишларни белгиланган тартибда амалга ошириш, ер ҳақидаги қонун ҳужжатлари бузилиши сабаблари ва оқибатларини бартараф этишга йўналтирилган, давлат бошқаруви органлари, юридик ва жисмоний шахслар томонидан бажарилиши мажбурий бўлган ёзма кўрсатмалар бериш;

айбдор мансабдор шахслар ва фуқароларни белгиланган тартибда маъмурий жавобгарликка тортиш, ер қонунчилиги бузилиши оқибатида етказилган зарарни ундириш бўйича даъволар тақдим этиш, ер ҳақидаги қонун ҳужжатлари бузилишида айбдор бўлган шахсларни жавобгарликка тортиш учун тақдимномаларни тегишли корхоналар, муассасалар, ташкилотларга жўнатиш;

ер ҳақидаги қонун ҳужжатларида белгиланган ҳолларда ер участкаларига бўлган ҳуқуқларни тўхтатиш тўғрисида маҳаллий давлат ҳокимияти органларига таклифлар киритиш;

геодезия ва картография фаолияти субъектларини белгиланган тартибда текшириш;

халқаро ташкилотларда ерлардан фойдаланиш, геодезия, картография ва кадастр масалалари бўйича Ўзбекистон Республикаси манфаатларини ифодалаш;

ерлардан фойдаланиш ва уларни муҳофаза қилиш, шунингдек Давлат кадастрлари ягона тизимини юритиш билан боғлиқ масалаларни биргаликда ишлаб чиқиш учун бошқа вазирликлар, идоралар, Қорақалпоғистон Республикаси Вазирлар Кенгаши, ҳокимликлар, муассасалар ва ташкилотлар мутахассисларини белгиланган тартибда жалб этиш.

«Ергеодезкадастр» давлат қўмитаси Ўзбекистон Республикаси қонун ҳужжатларига мувофиқ бошқа ҳуқуқларга ҳам эга бўлиши мумкин.

11. «Ергеодезкадастр» давлат қўмитаси вазирликлар, давлат қўмиталари, идоралар, маҳаллий давлат ҳокимияти органлари, корхоналар, муассасалар, ташкилотлар, мансабдор шахслар ва фуқаролар томонидан бажарилиши мажбурий бўлган норматив ҳужжатларни ўз ваколатлари доирасида тасдиқлашга ҳақлидир.

«Ергеодезкадастр» давлат қўмитаси, зарур ҳолларда, бошқа вазирликлар, давлат қўмиталари ва идоралар билан бирга қўшма қарорлар ва бошқа ҳужжатлар чиқаришга ҳақлидир.

12. «Ергеодезкадастр» давлат қўмитаси ўзига юкланган вазифаларнинг самарали бажарилиши учун жавоб беради.

IV. «Ергеодезкадастр» давлат қўмитаси фаолиятини ташкил этиш

13. «Ергеодезкадастр» давлат қўмитасига қонун ҳужжатларида белгиланган тартибда лавозимга тайинланадиган ва лавозимдан озод қилинадиган раис бошчилик қилади.

«Ергеодезкадастр» давлат қўмитаси раиси айни бир вақтда ерлардан фойдаланилиши ва уларнинг муҳофаза қилинишини назорат қилиш бўйича Ўзбекистон Республикасининг бош давлат инспектори ҳисобланади.

Раиснинг уч нафар ўринбосари, шу жумладан бир нафар биринчи ўринбосари бўлади.

«Ергеодезкадастр» давлат қўмитаси раисининг ўринбосарлари қонун ҳужжатларида белгиланган тартибда лавозимга тайинланади ва лавозимдан озод қилинади.

Раиснинг биринчи ўринбосари айни бир вақтда Геодезия ва картография бош бошқармасининг бошлиғи ҳисобланади.

14. «Ергеодезкадастр» давлат қўмитасининг раиси:

«Ергеодезкадастр» давлат қўмитаси фаолиятига умумий раҳбарликни амалга оширади;

«Ергеодезкадастр» давлат қўмитаси ваколатига кирувчи масалалар бўйича қарорлар қабул қилади ҳамда «Ергеодезкадастр» давлат қўмитасига юкланган вазифалар ва функцияларнинг бажарилиши учун шахсан жавоб беради;

ўз ўринбосарлари ваколатларини белгилайди, улар ўртасида вазифаларни тақсимлайди, «Ергеодезкадастр» давлат қўмитаси тизими бошқа мансабдор шахсларининг ваколатларини, ўз ўринбосарларининг ва бошқа мансабдор шахсларнинг «Ергеодезкадастр» давлат қўмитаси фаолияти айрим участкаларига раҳбарлик қилиш ҳамда идоравий мансуб органлар ва муассасалар ишлари юзасидан жавобгарлик даражасини белгилайди;

«Ергеодезкадастр» давлат қўмитаси тизими ходимлари томонидан бажарилиши мажбурий бўлган буйруқлар чиқаради ва кўрсатмалар беради ҳамда уларнинг бажарилиши устидан назоратни ташкил қилади;

«Ергеодезкадастр» давлат қўмитаси тузилмасига ходимларнинг белгиланган умумий сони доирасида ўзгартиришлар киритади, қўмита марказий аппаратининг штат жадвалини, шунингдек «Ергеодезкадастр» давлат қўмитаси марказий аппарати, идоравий мансуб органлар ва муассасалар харажатлари сметасини тасдиқлайди;

«Ергеодезкадастр» давлат қўмитасининг таркибий ва ҳудудий бўлинмалари тўғрисидаги низомларни, идоравий мансуб бошқа органларнинг ҳамда «Ергеодезкадастр» давлат қўмитаси тизимига кирувчи муассасаларнинг низомларини (уставларини) белгиланган тартибда тасдиқлайди;

«Ергеодезкадастр» давлат қўмитаси марказий аппарати ходимларини, ҳудудий бўлинмаларнинг, идоравий мансуб бошқа органларнинг ҳамда «Ергеодезкадастр» давлат қўмитаси тизимига кирувчи муассасалар раҳбарларини белгиланган тартибда лавозимга тайинлайди ва лавозимдан озод қилади.

Раис қонун ҳужжатларига мувофиқ бошқа ваколатларни амалга оширади.

15. «Ергеодезкадастр» давлат қўмитасида таркибига раис (ҳайъат раиси), раис ўринбосарлари (лавозимига кўра), «Ергеодезкадастр» давлат қўмитасининг бошқа раҳбар ходимлари, шунингдек давлат бошқаруви бошқа органларининг раҳбар ходимлари кирадиган, 9 кишидан иборат ҳайъат ташкил этилади.

Ҳайъатнинг шахсий таркиби «Ергеодезкадастр» давлат қўмитаси раисининг тақдимномасига биноан Ўзбекистон Республикаси Вазирлар Маҳкамаси томонидан тасдиқланади.

«Ергеодезкадастр» давлат қўмитаси ҳайъати қўмита фаолиятининг асосий масалаларини кўриб чиқади, «Ергеодезкадастр» давлат қўмитаси таркибий ва ҳудудий бўлинмалари, бошқа идоравий мансуб органлар ва муассасалар раҳбарларининг ҳисоботларини эшитади, «Ергеодезкадастр» давлат қўмитасининг энг муҳим қарорлари ва бошқа ҳужжатлари лойиҳаларини муҳокама қилади.

Ҳайъат қарорлари «Ергеодезкадастр» давлат қўмитаси қарорлари билан амалга оширилади.

Раис билан ҳайъат аъзолари ўртасида келишмовчиликлар пайдо бўлган тақдирда «Ергеодезкадастр» давлат қўмитаси раиси пайдо бўлган келишмовчиликлар тўғрисида Ўзбекистон Республикаси Вазирлар Маҳкамасига ахборот берган ҳолда

ўз қарорини амалга оширади, ҳайъат аъзолари эса, ўз навбатида, ўз фикрини Ўзбекистон Республикаси Вазирлар Маҳкамасига маълум қилишлари мумкин.

16. Қорақалпоғистон Республикаси, вилоятлар ҳамда Тошкент шаҳар ер ресурслари ва давлат кадастри бошқармалари ўз фаолиятини Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимлари билан келишилган ҳолда «Ергеодезкадастр» давлат қўмитаси томонидан тасдиқланган низомларга мувофиқ амалга оширадилар.

Қорақалпоғистон Республикаси, вилоятлар ҳамда Тошкент шаҳар ер ресурслари ва давлат кадастри бошқармалари бошлиқлари айни бир вақтда тегишли ҳудудларда ерлардан фойдаланилиши ва уларнинг муҳофаза қилинишини назорат қилиш бўйича давлат инспекторлари ҳисобланадилар.

Туманлар, (шаҳарлар) ер ресурслари ва давлат кадастри бўлимлари ўз фаолиятини туманлар (шаҳарлар) ҳокимлари билан келишилган ҳолда Қорақалпоғистон Республикаси ҳамда вилоятлар ер ресурслари ва давлат кадастри бошқармалари томонидан тасдиқланган низомларга мувофиқ амалга оширадилар.

Қорақалпоғистон Республикаси, вилоятлар ҳамда Тошкент шаҳар ер ресурслари ва давлат кадастри бошқармалари бошлиқлари, шунингдек хўжалик юритувчи асосий субъектлар раҳбарлари Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари тақдимномасига биноан «Ергеодезкадастр» давлат қўмитаси раиси томонидан лавозимга тайинланадилар ва лавозимдан озод қилинадилар.

Туманлар (шаҳарлар) ер ресурслари ва давлат кадастри бўлимлари бошлиқлари туманлар (шаҳарлар) ҳокимларининг тақдимномасига биноан Қорақалпоғистон Республикаси ҳамда вилоятлар ер ресурслари ва давлат кадастри бошқармалари бошлиқлари томонидан лавозимга тайинланадилар ва лавозимдан озод қилинадилар.

17. «Ергеодезкадастр» давлат қўмитасини қайта ташкил этиш ва тугатиш қонун ҳужжатларида белгиланган тартибда амалга оширилади.

Вазирлар Маҳкамасининг
2004 йил 19 октябрдаги 483-сон қарорига
7-ИЛОВА

I. Ўзбекистон Республикаси Ҳукуматининг ўз кучини йўқотган қарорлари рўйхати

1. Вазирлар Маҳкамасининг «Ўзбекистон Республикаси Вазирлар Маҳкамаси ҳузуридаги Геодезия, картография ва давлат кадастри бош бошқармаси фаолиятини ташкил этиш тўғрисида» 1996 йил 31 январдаги 44-сон қарори.

2. Вазирлар Маҳкамасининг «Вазирлар Маҳкамасининг «Ўзбекистон Республикасида кўчмас мулк давлат кадастрини юритиш тўғрисида» 1997 йил 2 июндаги 278-сон қарорига қўшимчалар киритиш ҳақида» 1997 йил 9 декабрдаги 541-сон қарори.

3. Вазирлар Маҳкамасининг «Ўзбекистон Республикаси Ер ресурслари давлат қўмитаси фаолиятини ташкил этиш масалалари тўғрисида» 1998 йил 27 июлдаги 314-сон қарори.

4. Вазирлар Маҳкамасининг «Ўзбекистон Республикаси Ҳукуматининг қарорларини ўз кучини йўқотган деб ҳисоблаш ва айрим қарорларига ўзгартиришлар киритиш тўғрисида» 1998 йил 25 декабрдаги 534-сон қарорига илованинг 1-банди.

II. Ўзбекистон Республикаси Ҳукуматининг айрим қарорларига киритилаётган ўзгартиришлар

1. Вазирлар Маҳкамасининг «Ўзбекистон Республикасида кўчмас мулк давлат кадастрини юритиш тўғрисида» 1997 йил 2 июндаги 278-сон қарорида:

а) қарор номидаги «кўчмас мулк» сўзи «бинолар ва иншоотлар» сўзлари билан алмаштирилсин;

б) 1-банднинг учинчи хатбошидаги «бинолар ва иншоотларнинг» сўзлари «бинолар ва иншоотларга бўлган ҳуқуқларнинг» сўзлари билан алмаштирилсин ва 2-илова янги таҳрирда баён қилинсин (илова қилинмоқда);

в) 2-банд қуйидаги таҳрирда баён қилинсин:

«2. Туманлар ва шаҳарларда бинолар ва иншоотлар давлат кадастрини юритиш Ўзбекистон Республикаси Ер ресурслари, геодезия, картография ва давлат кадастри давлат қўмитасининг туманлар (шаҳарлар) ер ресурслари ва давлат кадастри бўлимларига юклансин»;

г) 3-банд қуйидаги таҳрирда баён қилинсин:

«3. Белгилансинки, Ўзбекистон Республикаси Фуқаролик кодексининг 84-моддасида назарда тутилган бинолар ва иншоотларга эгалик ҳуқуқини ҳамда улар юзасидан битишувларни давлат рўйхатидан ўтказиш Ўзбекистон Республикаси Ер ресурслари, геодезия, картография ва давлат кадастри давлат қўмитасининг Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармаларининг рўйхатдан ўтказиш идоралари томонидан амалга оширилади.

д) 6-банд ўз кучини йўқотган деб ҳисоблансин;

е) Бинолар ва иншоотлар давлат кадастрини юритиш тартиби тўғрисида низомда:

9-банддаги «туман, шаҳар кўчмас мулк кадастри хизматлари» сўзлари «туман, шаҳар ер ресурслари ва давлат кадастри бўлимига» сўзлари билан алмаштирилсин;

16-банднинг тўртинчи хатбоши чиқариб ташлансин;

26-банддаги «Ўзгеодезкадастр» бош бошқармаси» сўзлари «Ергеодезкадастр» давлат қўмитаси» сўзлари билан алмаштирилсин.

2. Вазирлар Маҳкамасининг «Ўзбекистон Республикасида давлат ер кадастрини юритиш тўғрисида» 1998 йил 31 декабрдаги 543-сон қарорида:

а) 2-банд қуйидаги таҳрирда баён қилинсин:

«2. Туманлар ва шаҳарларда бинолар ва иншоотлар давлат кадастрини юритиш Ўзбекистон Республикаси Ер ресурслари, геодезия, картография ва давлат кадастри давлат қўмитасининг туманлар (шаҳарлар) ер ресурслари ва давлат кадастри бўлимларига юклансин»;

б) 3 ва 7-бандлар ўз кучини йўқотган деб ҳисоблансин;

в) Давлат ер кадастрини юритиш тартиби тўғрисида низомда:

23-бандда:

«Ер ресурслари давлат қўмитаси ва «Ўзгеодезкадастр» бош бошқармаси» сўзлари «Ергеодезкадастр» давлат қўмитаси» сўзлари билан алмаштирилсин;

«Макроиқтисодиёт ва статистика вазирлиги» сўзлари «Иқтисодиёт вазирлиги» сўзлари билан алмаштирилсин;

24-банддаги «хизматларнинг» сўзи «туманлар (шаҳарлар) ер ресурслари ва давлат кадастри бўлимларининг» сўзлари билан алмаштирилсин;

25-банд қуйидаги таҳрирда баён қилинсин:

«25. Туманлар ва шаҳарларда бинолар ва иншоотлар давлат кадастрини юри-

тиш Ўзбекистон Республикаси Ер ресурслари, геодезия, картография ва давлат кадастри давлат қўмитасининг туманлар (шаҳарлар) ер ресурслари ва давлат кадастри бўлимлари томонидан амалга оширилади»;

27—29-бандлар қуйидаги таҳрирда баён қилинсин:

«27. Туманлар (шаҳарлар) ер ресурслари ва давлат кадастри бўлимлари:

мулкдорлардан, ер эгаларидан, ердан фойдаланувчилардан ва ижарачилардан ҳуқуқий ҳолатда, ер участкаларининг таркибида ва ер участкаларидан фойдаланишда юз берган ўзгаришлар тўғрисидаги маълумотларни тўплайдилар ва натурада текширилгандан кейин жорий ўзгаришларни уч кун мобайнида ер кадастри ахборотига киритадилар;

туман (шаҳар) ер ресурслари миқдори ва уларнинг сифати тўғрисидаги маълумотлар банкларини тузадилар ва уларни замонавий даражада тутадилар;

ҳар йили 15 январгача Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармаларига ерларнинг миқдори ва улардан фойдаланиш тўғрисида ҳисобот тақдим этадилар.

28. Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари:

туманлар (шаҳарлар) ер ресурслари ва давлат кадастри бўлимларининг ер кадастрини юритишга доир фаолиятини мувофиқлаштириб борадилар;

туманлар (шаҳарлар) ер ресурслари ва давлат кадастри бўлимларининг ҳисоботларини умумлаштирадилар, ер участкасига эгалик ҳуқуқи субъектлари, минтақадаги ер ресурслари миқдори, сифати ва уларни баҳолашга доир маълумотлар банкни яратадилар, Республика ер маълумотлари ягона банкни яратишда қатнашадилар;

ер участкаларига бўлган мулкчилик, уларга эгалик қилиш, улардан фойдаланиш ва ижарага олиш ҳуқуқини, сервитутлар тўғрисидаги битимларни ва ушбу ҳуқуқлар бўйича бошқа чеклашларни рўйхатдан ўтказадилар;

табиатни муҳофаза қилиш органлари билан келишиб олинган минтақа ерларининг миқдори ва улардан фойдаланилиши тўғрисидаги ҳисоботларни ҳар йили 1 февралгача «Ергеодезкадастр» давлат қўмитасига тақдим этадилар.

29. «Ергеодезкадастр» давлат қўмитаси:

давлат ер кадастри юритилишини тартибга солувчи меъёрий ҳужжатларнинг ишлаб чиқилишини таъминлайди;

вилоятлар, шаҳарлар, туманларнинг маъмурий чегараларини, кейинчалик уларнинг майдонларини мувофиқлаштирган ҳолда, геодезик усуллар билан белгилаш ва жойларга бириктириб қўйиш ишларини амалга оширади;

топография-геодезия ишларини ва ерларни тегишли масштабларда харитага олишни ташкил қилади;

ер ресурсларини аэрокосмик усуллар билан ўрганишни ташкил этади;

ҳудудий бўлинмаларнинг ерларнинг миқдори ва улардан фойдаланилиши тўғрисидаги ҳисоботларини ўрганади, таҳлил қилади ва умумлаштиради;

ишлаб чиқилган ер кадастри ахборотлари сифатини назорат қилади;

мутахассислар тайёрлаш ва уларнинг малакасини оширишни ташкил этади;

тупрок, геоботаник ва бошқа турдаги махсус тадқиқотларни, ерларни баҳолашни ташкил этади;

ер кадастри ахборотининг сифати ва ҳар хиллигига талабни мунтазам ўрганиб боради, ер кадастрини юритиш технологиясини такомиллаштиришни таъминлайди;

республика минтақалари бўйича ер кадастри ҳужжатларини янгилаш навбатини ва муддатларини асослаб беради;

автоматлаштирилган ер ахбороти тизимини жорий этишни ва унинг фаолиятини амалга оширади;

ер кадастри ахборотларини нашр этади, манфаатдор вазирликлар ва идораларга маълумотлар тақдим этади;

Давлат кадастрлари ягона тизимига тақдим этиладиган ер кадастри ахборотлари таркибини, ҳажмини ва уларга техник талабларни белгилайди;

ҳар йили 1 мартгача Ўзбекистон Республикаси Вазирлар Маҳкамасига Ер ресурсларининг ҳолати тўғрисида Миллий ҳисоботни тақдим этади;

30 ва 31-бандлар ўз кучини йўқотган деб ҳисоблансин.

3. Вазирлар Маҳкамасининг «Ўзбекистон Республикаси ўсимлик дунёси объектларининг давлат кадастрини юритиш тартиби тўғрисидаги низомни ва Ўзбекистон Республикаси ҳайвонот дунёсининг давлат кадастрини юритиш тартиби тўғрисидаги низомни тасдиқлаш ҳақида» 2000 йил 5 сентябрдаги 343-сон қарорида (Ўзбекистон Республикаси ҚТ, 2000 й., 9-сон, 57-модда):

а) Ўзбекистон Республикаси ўсимлик дунёси объектларининг давлат кадастрини юритиш тартиби тўғрисида низомда:

19-банддаги «Ер ресурслари давлат қўмитаси» сўзлари «Ергеодезкадастр» давлат қўмитаси» сўзлари билан алмаштирилсин;

21-банддаги «Ўзгеодезкадастр» бош бошқармаси» сўзлари «Ергеодезкадастр» давлат қўмитаси» сўзлари билан алмаштирилсин;

б) Ўзбекистон Республикаси ҳайвонот дунёсининг давлат кадастрини юритиш тартиби тўғрисида низомнинг 20-бандидаги «Ўзгеодезкадастр» бош бошқармаси» сўзлари «Ергеодезкадастр» давлат қўмитаси» сўзлари билан алмаштирилсин.

4. Вазирлар Маҳкамасининг «Коммунал хизмат кўрсатиш тизими фаолиятини ташкил этишни такомиллаштириш тўғрисида» 2000 йил 21 декабрдаги 493-сон қарорида:

а) 5-банд чиқариб ташлансин;

б) 3-иловадаги «Техник хатловдан ўтказиш кадастр бюроси» сўзлари чиқариб ташлансин.

5. Вазирлар Маҳкамасининг «Ўзбекистон Республикасида Ер мониторинги тўғрисидаги низомни тасдиқлаш ҳақида» 2000 йил 23 декабрдаги 496-сон қарорида (Ўзбекистон Республикаси ҚТ, 2000 й., 12-сон, 79-модда):

а) 2-банддаги «Ўзбекистон Республикаси Ер ресурслари давлат қўмитаси» сўзлари «Ўзбекистон Республикаси Ер ресурслари, геодезия, картография ва давлат кадастри давлат қўмитаси» сўзлари билан алмаштирилсин;

б) Ўзбекистон Республикасида Ер мониторинги тўғрисида низомда:

9-банддаги «Ўзбекистон Республикаси Ер ресурслари давлат қўмитаси, Ўзбекистон Республикаси Вазирлар Маҳкамаси ҳузуридаги Геодезия, картография ва давлат кадастри бош бошқармаси» сўзлари «Ўзбекистон Республикаси Ер ресурслари, геодезия, картография ва давлат кадастри давлат қўмитаси» сўзлари билан алмаштирилсин;

9-банднинг иккинчи хатбошидаги ва 10-банддаги «Ўзбекистон Республикаси Ер ресурслари давлат қўмитаси» сўзлари «Ўзбекистон Республикаси Ер ресурслари, геодезия, картография ва давлат кадастри давлат қўмитаси» сўзлари билан алмаштирилсин;

11-банддаги «ер ресурслари бўйича тегишли хизматларга», «ер ресурслари бўйича хизматлар» сўзлари тегишли равишда «ер ресурслари ва давлат кадастри бўлимларига», «ер ресурслари ва давлат кадастри бўлимлари» сўзлари билан алмаштирилсин;

16—18-бандлар қуйидаги таҳрирда баён қилинсин:

«16. Қорақалпоғистон Республикаси, вилоятлар ва Тошкент шаҳрида ерларнинг базавий ва даврий мониторинги — Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари томонидан юритилади.

17. Ерларнинг тезкор (навбатчи) мониторинги туманлар ва шаҳарлардаги базавий ва даврий мониторинг маълумотларидан фойдаланган ҳолда — туманлар (шаҳарлар) ер ресурслари ва давлат кадастри бўлимлари томонидан юритилади.

18. Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари Давлат табиатни муҳофаза қилиш қўмитасининг ҳудудий органлари билан биргаликда ҳар йили 1 февралдан кечиктирмай маҳаллий давлат ҳокимияти органларига, Ўзбекистон Республикаси «Ергеодезкадастр» давлат қўмитасига, Давлат табиатни муҳофаза қилиш қўмитасига минтақадаги ерларнинг ҳолати тўғрисида ахборотлар (ҳисоботлар) тақдим этадилар, ўта хавfli ва йўл қўйилиши чекланган жараёнлар аниқланганда тезкор маълумотлар юборадилар».

6. Вазирлар Маҳкамасининг 2001 йил 31 декабрдаги 492-сон қарори билан тасдиқланган Ўзбекистон Республикаси ҳудудларини кадастр бўйича бўлиш ҳамда ер участкалари, бинолар ва иншоотларнинг кадастр рақамларини шакллантириш тартиби тўғрисида низомда (Ўзбекистон Республикаси ҚТ, 2001 й., 11-12-сон, 66-модда):

а) 7-банд қуйидаги таҳрирда баён қилинсин:

«7. Худудларни кадастр бўйича бўлиш Қорақалпоғистон Республикаси, вилоятлар ва Тошкент шаҳар ер ресурслари ва давлат кадастри бошқармалари томонидан амалга оширилади»;

б) 15-банд қуйидаги таҳрирда баён қилинсин:

«15. Ер участкаларига, бинолар ва иншоотларга, биноларнинг, иншоотларнинг бир қисмига кадастр рақамлари бериш ушбу объектларга эгалик қилиш ҳуқуқлари давлат рўйхатидан рўйхатдан ўтказиш идоралари томонидан ўтказилган ҳолларда Ўзбекистон Республикаси Ер ресурслари, геодезия, картография ва давлат кадастри давлат қўмитасининг Қорақалпоғистон Республикаси, вилоятлар ва Тошкент шаҳар Ер ресурслари ва давлат кадастри бошқармалари томонидан амалга оширилади».

7. Вазирлар Маҳкамасининг «Ўзбекистон Республикасида атроф табиий муҳитнинг давлат мониторинги тўғрисидаги низомни тасдиқлаш ҳақида» 2002 йил 3 апрелдаги 111-сон қарорида (Ўзбекистон Республикаси ҚТ, 2002 й., 4-сон, 19-модда):

а) 2-банддаги «Ер ресурслари давлат қўмитаси» сўзлари «Ер ресурслари, геодезия, картография ва давлат кадастри давлат қўмитаси» сўзлари билан алмаштирилсин;

б) Ўзбекистон Республикасида атроф табиий муҳитнинг давлат мониторинги тўғрисида низомда:

12-банднинг бешинчи хатбошидаги «Ўзбекистон Республикаси Ер ресурслари давлат қўмитаси» сўзлари «Ўзбекистон Республикаси Ер ресурслари, геодезия, картография ва давлат кадастри давлат қўмитаси» сўзлари билан алмаштирилсин;

1-2-иловалардаги «Ер ресурслари давлат қўмитаси» сўзлари «Ергеодезкадастр» давлат қўмитаси» сўзлари билан алмаштирилсин.

8. Вазирлар Маҳкамасининг 2003 йил 14 ноябрдаги 510-сон қарори (Ўзбекистон Республикаси ҚТ, 2003 й., 11-сон, 119-модда) билан тасдиқланган Геодезия ва картография фаолиятини лицензиялаш тўғрисида низом матнидаги ҳамда унга 2-ило-

вадаги «Ўзбекистон Республикаси Вазирлар Маҳкамаси ҳузуридаги Геодезия, картография ва давлат кадастри бош бошқармаси», «Ўзгеодезкадастр» бош бошқармаси», «Ўзгеодезкадастр» бош бошқармасига», «Ўзгеодезкадастр» бош бошқармасининг», «Ўзгеодезкадастр» бош бошқармасида» сўзлари тегишли равишда Ўзбекистон Республикаси Ер ресурслари, геодезия, картография ва давлат кадастри давлат қўмитаси», «Ергеодезкадастр» давлат қўмитаси», «Ергеодезкадастр» давлат қўмитасига», «Ергеодезкадастр» давлат қўмитасининг», «Ергеодезкадастр» давлат қўмитасида» сўзлари билан алмаштирилсин.

Вазирлар Маҳкамасининг
1997 йил 2 июндаги 278-сон қарорига
2-ИЛОВА

(Вазирлар Маҳкамасининг
2004 йил 19 октябрдаги 483-сон қарори
тахририда)

**Ўзбекистон Республикаси
Герби**

**БИНОЛАР ВА ИНШОТЛАРГА БЎЛГАН ҲУҚУҚНИНГ ДАВЛАТ
РЎЙХАТИДАН ЎТКАЗИЛГАНЛИГИ ТЎҒРИСИДА
ГУВОҲНОМА**

Серия № 000000

Ушбу гувоҳнома _____ га
(юридик ёки жисмоний шахсинг номи)
 солиқ тўловчининг идентификация тартиб рақами (ИНН) _____,
(бино, иншоотнинг жойлашган жойи)
 _____ манзилда жойлашган
 _____ бино, иншоот _____
(хуқук тури)
 _____ хуқуқи билан тегишли
 эканлиги ҳақида берилди ва унга _____ кадастр
 рақами берилди. Бу тўғрида _____
(хужжатлар номи)
 _____ асосида
 _____ - сон билан _____ нинг
(туман, шаҳар)
 бино, иншоотга бўлган хуқуқни рўйхатга олиш кадастр (реестр) дафтарига тегиш-
 лича ёзиб қўйилди.

Рўйхатга олувчи _____

М.Ў. _____ 20__ й. «___» _____

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

447 Бюджетдан ташқари Пенсия жамғармасини бошқаришни янада такомиллаштириш тўғрисида

Ижтимоий таъминот тизимида давлат кафолатларини амалга ошириш ҳамда пенсиялар, нафақалар ва компенсацияларни тўлашга йўналтириладиган маблағларнинг мақсадли ва аниқ сарфланиши устидан назоратни кучайтириш, шунингдек бюджетдан ташқари Пенсия жамғармасини самарали бошқаришни ташкил этиш мақсадида Вазирлар Маҳкамаси **қарор қилади:**

1. 2005 йил 1 январдан бошлаб Ўзбекистон Республикасининг бюджетдан ташқари Пенсия жамғармаси Ўзбекистон Республикаси Молия вазирлиги ҳузуридаги Пенсия жамғармасига (кейинги ўринларда Жамғарма деб аталади) айлантирилсин.

2. Қуйидагилар бюджетдан ташқари Пенсия жамғармасининг асосий вазифалари ҳисоблансин:

фуқароларнинг давлат томонидан кафолатланган ижтимоий таъминот ва ижтимоий суғуртага бўлган хуқуқларини амалга ошириш;

Ўзбекистон Республикаси Қонун ҳужжатлари тўплами, 2004 й.

мажбурий ажратмалар, бадаллар ва бошқа тўловларни бюджетдан ташқари Пенсия жамғармасининг ягона йиғма ҳисоб рақамида жамлаш;

2005 йил 1 январдан бошлаб пенсиялар, нафақалар ва компенсацияларни тўлаш харажатларини молиялаштириш;

бюджетдан ташқари Пенсия жамғармасига маблағларнинг тўлиқ тушиши ва ўз вақтида сарфланиши устидан назоратни таъминлаш.

3. Қуйидагилар:

Ўзбекистон Республикаси Молия вазирлиги ҳузуридаги бюджетдан ташқари Пенсия жамғармасини бошқариш кенгаши таркиби 1-иловага* мувофиқ;

Ўзбекистон Республикаси Молия вазирлиги ҳузуридаги бюджетдан ташқари Пенсия жамғармаси Ижро этувчи дирекциясининг ходимларнинг чекланган умумий сони 16 киши, шу жумладан бошқарув ходимлари сони 14 киши бўлган тузилмаси 2-иловага мувофиқ;

Ўзбекистон Республикаси Молия вазирлиги ҳузуридаги Пенсия жамғармаси тўғрисидаги низом 3-иловага мувофиқ тасдиқлансин.

Ўзбекистон Республикаси Молия вазирлиги бир ой муддатда Ўзбекистон Республикаси Молия вазирлиги ҳузуридаги бюджетдан ташқари Пенсия жамғармасининг Ижро этувчи дирекциясини ташкил этсин.

4. Белгилаб қўйилсинки, қуйидагилар бюджетдан ташқари Пенсия жамғармасини шакллантиришнинг асосий манбалари ҳисобланади:

а) мажбурий ажратмалар ва бадаллар:

мулкчилик шаклларида қатъи назар, юридик шахслар иш ҳақи фондидан ягона ижтимоий тўловнинг белгиланган миқдори;

алоҳида юридик шахслардан ижтимоий суғуртага бадаллар;

юридик шахс бўлмасдан тадбиркорлик фаолияти билан шуғулланувчи жисмоний шахсларнинг ижтимоий суғуртага бадаллари;

фуқароларнинг иш ҳақидан суғурта бадаллари;

юридик шахсларнинг товар айланмаси ва сотилган маҳсулотлар (бажарилган ишлар, кўрсатилган хизматлар) ҳажмидан ажратмалари, қўшилган қиймат солиғи ва акциз солиғи чиқариб ташланган ҳолда;

б) бошқа тўловлар:

муддатидан олдин ва имтиёзли пенсиялар тайинланиши муносабати билан қопланадиган маблағлар, шунингдек «Фуқароларнинг давлат пенсия таъминоти тўғрисида»ги Ўзбекистон Республикаси Қонунига мувофиқ регресс талаблар (даъволар) бўйича иш берувчилар ва фуқаролардан ундириладиган маблағлар;

деҳқон хўжаликлари аъзоларининг ихтиёрий равишда тўланадиган суғурта бадаллари;

мажбурий ажратмалар, бадаллар ва бошқа тўловлар ўз вақтида тўланмаганлиги учун белгиланган тартибда ҳисобланган жарималар ва пеня;

қонун ҳужжатларида тақиқланмаган бошқа манбалар.

Белгилаб қўйилсинки, бюджетдан ташқари Пенсия жамғармасининг вақтинча бўш маблағларини молия бозорларида жойлаштиришдан фоиз сифатида олинadиган даромадларга солиқ солинмайди.

5. Белгилансинки:

бюджетдан ташқари Пенсия жамғармасига мажбурий ажратмалар, бадаллар ва бошқа тўловлар миқдори ҳамда уларни тўлаш тартиби қонун ҳужжатларига мувофиқ белгиланади;

* 1-илова берилмайди.

бюджетдан ташқари Пенсия жамғармасига мажбурий ажратмалар, бадаллар ва тўловлар давлат солиқлари ва йиғимларига тенглаштирилади;

бюджетдан ташқари Пенсия жамғармасининг даромадлари ва харажатлари Ўзбекистон Республикасининг йиғма бюджети таркибига киритилади;

Ўзбекистон Республикаси Давлат солиқ қўмитаси бюджетдан ташқари Пенсия жамғармасига мажбурий ажратмалар, бадаллар ва тўловларни йиғиш ва уларнинг тўлиқ тушишини назорат қилиш функцияларини амалга оширади;

Ўзбекистон Республикаси Меҳнат ва аҳолини ижтимоий муҳофаза қилиш вазирлиги пенсиялар, нафақалар ва компенсацияларнинг ўз вақтида тайинланиши ва тўланиши, шунингдек корхоналар, ташкилотлар ва муассасаларнинг давлат ижтимоий суғурта бўйича харажатлари белгиланган тартибда молиялаштирилиши устидан назоратни таъминлайди.

6. Ўзбекистон Республикаси Меҳнат ва аҳолини ижтимоий муҳофаза қилиш вазирлиги:

Ўзбекистон Республикаси бюджетдан ташқари Пенсия жамғармасининг барча даражалардаги ҳисоб рақамларидаги 2004 йил 31 декабрдаги ҳолатига кўра қолдиқ маблағларнинг Ўзбекистон Республикаси Молия вазирлиги ҳузуридаги бюджетдан ташқари Пенсия жамғармаси ҳисоб рақамига ўтказилишини таъминласин;

Ўзбекистон Республикаси Молия вазирлиги ва Марказий банки билан биргаликда пенсиялар ва ижтимоий нафақаларни етказиб бериш механизмини такомиллаштириш юзасидан таклифларни бир ой муддатда ишлаб чиқсин ва жорий этсин.

7. Ўзбекистон Республикаси Ҳукуматининг 4-иловага мувофиқ айрим қарорлари ўз кучини йўқотган деб ҳисоблансин.

Ўзбекистон Республикаси Адлия вазирлиги, вазирликлар ва идоралар бир ой муддатда амалдаги норматив ҳужжатларга мазкур қарордан келиб чиқадиган ўзгартириш ва қўшимчалар киритсинлар.


8. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2004 йил 21 октябрь,
490-сон

Вазирлар Маҳкамасининг
2004 йил 21 октябрдаги 490-сон қарорига
2-ИЛОВА

**Ўзбекистон Республикаси Молия вазирлиги ҳузуридаги
бюджетдан ташқари Пенсия жамғармаси Ижро этувчи
дирекциясининг тузилмаси**



Ходимларнинг чекланган умумий со ни — 16 киши,
шу жумладан:
бошқарув ходимлари — 14 киши;
ёрдамчи ходимлар — 2 киши.

Вазирлар Маҳкамасининг
2004 йил 21 октябрдаги 490-сон қарорига
3-ИЛОВА

**Ўзбекистон Республикаси Молия вазирлиги ҳузуридаги
бюджетдан ташқари Пенсия жамғармаси тўғрисида
НИЗОМ**

I. Умумий қоидалар

Ушбу Низом Ўзбекистон Республикаси Молия вазирлиги ҳузуридаги бюджетдан ташқари Пенсия жамғармаси даромадларини шакллантириш ва маблағларини сарфлаш тартибини ҳамда Жамғармани бошқариш принципларини белгилайди.

1. Ўзбекистон Республикаси Молия вазирлиги ҳузуридаги бюджетдан ташқари Пенсия жамғармаси (кейинги ўринларда Жамғарма деб аталади) ижтимоий таъминот тизимида давлат кафолатларини амалга оширишга йўналтирилган мақсадли молиявий ресурсларни жамлайди.

2. Жамғарма маблағлари Ўзбекистон Республикаси Марказий банкидаги ягона йиғма ҳисоб рақамида жамланади.

3. Жамғарманинг Ижро этувчи дирекцияси Жамғарма маблағларининг тасаруфчиси ҳисобланади.

4. Мажбурий ажратмалар, бадаллар ва бошқа тўловларнинг йиғилишини таъминлаш, шунингдек ушбу маблағларнинг Жамғармага тўлиқ тушишини назорат қилиш Ўзбекистон Республикаси Давлат солиқ хизмати органлари томонидан амалга оширилади.

5. Жамғарманинг даромадлари ва харажатлари маблағларни шакллантириш ва сарфлашнинг мақсадли йўналтирилганлиги сақлаб қолинган ҳолда Ўзбекистон Республикасининг йўлма бюджети таркибига киритилади ва Жамғарма балансида акс эттирилади.

6. Жамғарма юридик шахс ҳисобланади, Ўзбекистон Республикаси Марказий банкида мустақил балансга, ҳисоб рақамларига, шу жумладан хорижий валютадаги ҳисоб рақамларига, Ўзбекистон Республикаси Давлат герби тасвири туширилган гербли муҳрга эга бўлади.

7. Жамғарманинг юридик манзили: Ўзбекистон Республикаси, Тошкент шаҳри, Х. Сулаймонова кўчаси 29-уй.

II. Жамғарманинг мақсади ва асосий вазифалари

8. Мажбурий ажратмалар, бадаллар ва бошқа тўловлардан тушган маблағларни жамлаш йўли билан ижтимоий таъминот тизимида давлат кафолатларини амалга ошириш, шунингдек маблағларнинг пенсиялар, нафақалар ва компенсацияларни тўлашга мақсадли ва самарали сарфланиши устидан назоратни кучайтириш Жамғарма фаолиятининг мақсади ҳисобланади.

9. Қуйидагилар Жамғарманинг асосий вазифалари ҳисобланади:

фуқароларнинг ижтимоий таъминотга ва ижтимоий суғуртага бўлган давлат томонидан кафолатланган ҳуқуқларини амалга ошириш;

республикада пенсия таъминотини янада такомиллаштириш;

мажбурий ажратмалар, бадаллар ва бошқа тўловларни Жамғарманинг бюджетдан ташқари махсус ҳисоб рақамида марказлаштирилган тартибда жамлаш;

пенсиялар, нафақалар ва компенсацияларни тўлашга харажатларни молиялаштириш;

Жамғарма маблағларининг мақсадли ва самарали сарфланиши устидан назоратни таъминлаш;

Жамғарма маблағларини кўпайтиришни ташкил этиш;

давлат ижтимоий суғуртаси соҳасида халқаро алоқаларни амалга ошириш, чет эл тажрибасини ўрганиш ва ундан фойдаланиш.

III. Жамғармани бошқариш кенгаши

10. Таркиби Ўзбекистон Республикаси Вазирлар Маҳкамаси томонидан тасдиқланган Жамғармани бошқариш кенгаши Жамғармани бошқаришнинг юқори органи ҳисобланади.

Жамғармани бошқариш кенгаши мажлислари ҳар ярим йилда камида бир марта ўтказилади.

Жамғарманинг ижро этувчи дирекцияси Жамғармани бошқариш кенгашининг ишчи органи ҳисобланади.

11. Қуйидагилар Жамғармани бошқариш кенгашининг функциялари ҳисобланади:

Жамғарма даромадлари ва харажатларининг прогноз кўрсаткичларини кўриб чиқиш ва тасдиқлаш;

Жамғарма ижро этувчи дирекциясининг амалга оширилган ишлар тўғрисидаги ҳисоботларини эшитиш ва тасдиқлаш;

Ўзбекистон Республикаси Давлат солиқ қўмитасининг мажбурий ажратмалар, бадаллар ва бошқа тўловларнинг Жамғармага тўлиқ ва ўз вақтида тўланишини таъминлаш тўғрисидаги ахборотларини эшитиш;

Ўзбекистон Республикаси Меҳнат ва аҳолини ижтимоий муҳофаза қилиш вазирлиги, «Ўзбекистон почтаси» очиқ акциядорлик жамияти ва Халқ банки бўлинмалари томонидан Жамғарма маблағларидан мақсадли фойдаланилиши масалаларини кўриб чиқиш;

Ўзбекистон Республикаси Вазирлар Маҳкамасига Жамғарма фаолиятини такомиллаштириш ва унинг маблағларидан фойдаланиш тўғрисида таклифлар киритиш;

Жамғарма ижро этувчи дирекциясининг фаолиятини, айниқса даромадлар манбаларини шакллантириш, Жамғарма маблағларининг ўз вақтида молиялаштирилиши ва мақсадли фойдаланилишига доир фаолиятини назорат қилиш;

Жамғарма даромадларининг шакллантирилиши ҳамда фуқароларнинг ижтимоий таъминотга ва ижтимоий суғуртага бўлган давлат томонидан кафолатланган ҳуқуқларининг амалга оширилиши билан боғлиқ бошқа функцияларни амалга ошириш.

IV. Жамғарманинг ижро этувчи органи

12. Тузилмаси ва ходимларининг сони Ўзбекистон Республикаси Вазирлар Маҳкамаси томонидан белгиланадиган Жамғарманинг ижро этувчи дирекцияси (кейинги ўринларда Ижро этувчи дирекция деб аталади) Жамғарманинг ижро этувчи органи ҳисобланади.

Ижро этувчи дирекциянинг таъминоти республика бюджети маблағлари ҳисобига амалга оширилади.

13. Жамғарманинг Ижро этувчи директори Ўзбекистон Республикаси Молия вазирининг тақдимномасига биноан Ўзбекистон Республикаси Вазирлар Маҳкамаси томонидан тайинланади ва вазир ўринбосарига тенглаштирилади.

Бюджетдан ташқари Пенсия жамғармасининг Ижро этувчи директори, зарурат бўлганда, Ижро этувчи дирекция тузилмасига ходимларнинг умумий сони доирасида ўзгартиришлар киритиш ҳуқуқига эга.

14. Ижро этувчи директор ўринбосари Ўзбекистон Республикаси Молия вазир томонидан лавозимга тайинланади ва лавозимдан озод қилинади.

Ижро этувчи дирекция:

мажбурий ажратмалар, бадаллар ва бошқа тўловлар миқдорларини белгилаш тўғрисида таклифлар ишлаб чиқади;

хар йили Ўзбекистон Республикаси Давлат солиқ қўмитаси билан биргаликда — даромадлар манбалари бўйича тушумлар прогнози, Ўзбекистон Республикаси Меҳнат ва аҳолини ижтимоий муҳофаза қилиш вазирлиги билан бирга — Жамғарма маблағлари харажатлари лойиҳасини ишлаб чиқади;

Жамғарма маблағларидан пенсиялар, нафақалар ва компенсацияларни молиялаштиради;

Жамғарма маблағларини ўз вақтида молиялаштириш ва улардан самарали фойдаланиш мониторингини амалга оширади;

Аҳолини ижтимоий муҳофаза қилиш вазирлиги бўлинмалари, корхоналар ва

ташкilotлар томонидан пенсиялар, нафақалар ва компенсацияларнинг тўғри ҳисобланиши бўйича режали текширишларни амалга оширади;

Давлат солиқ хизмати органлари томонидан Жамғармага мажбурий ажратмалар, бадаллар ва бошқа тўловларнинг тўлиқ ва ўз вақтида йиғилишини таъминлаш бўйича доимий мониторингни амалга оширади;

«Ўзбекистон почтаси» очик акциядорлик жамияти ҳамда Халқ банки бўлинмаларида пенсиялар, нафақалар ва компенсацияларнинг тўлиқлигини ва ўз вақтида тўланишини текширади;

давлат ижтимоий суғурта тизимининг барқарорлигини таъминлаш ва янада такомиллаштириш бўйича олдини олувчи чора-тадбирларни ишлаб чиқиш мақсадида Жамғарма даромадлари ва харажатларининг ўрта ва узоқ муддатли прогнозларини тайёрлайди ҳамда кўриб чиқиш учун Жамғармани бошқариш кенгашига киритади;

аниқланган камчиликларни бартараф этиш бўйича ёзма кўрсатмалар юборади;

Жамғармани бошқариш кенгашига Жамғарманинг пенсиялар, нафақалар ва тўловларнинг барқарорлигини ва ўз вақтида тўланишини таъминлаш учун зарур бўлган айланма — касса маблағларининг йилдан-йилга ўтувчи миқдорлари тўғрисида таклифлар киритади;

Жамғармани бошқариш кенгашига Жамғарма бюджетининг ижроси тўғрисидаги ҳисоботларни тайёрлайди ва белгиланган тартибда тақдим этади;

ўз ваколатлари доирасида Жамғарма вазифаларини амалга ошириш учун зарур бўлган йўриқнома ва методик ҳужжатларни ишлаб чиқади;

Жамғарманинг вақтинчалик бўш маблағларини Ўзбекистон Республикаси тижорат банкларидаги депозитларга ва давлат қимматли қоғозларига жойлаштиради;

топшириқномалар, ведомостлар ва почта жўнатмалари бўйича тўланадиган пенсиялар ҳамда нафақаларни жўнатганлик ва етказиб берганлик учун Ўзбекистон Республикаси Меҳнат ва аҳолини ижтимоий муҳофаза қилиш вазирлиги томонидан тақдим этилган тарифлар миқдорларини кўриб чиқади ва тасдиқлайди.

16. Жамғарманинг ижро этувчи дирекцияси Ўзбекистон Республикаси Давлат солиқ қўмитасидан — Жамғарма даромадларини шакллантиришга тааллуқли ҳамда Ўзбекистон Республикаси Меҳнат ва аҳолини ижтимоий муҳофаза қилиш вазирлигидан — Жамғарма маблағларининг сарфланиши бўйича ҳисобот маълумотлари ва ахборотларнинг тақдим этилишини талаб қилишга ҳақлидир.

V. Жамғарма даромадлари ва харажатлари прогнозини кўриб чиқиш ва келишиб олиш тартиби

17. Манбалар ва фойдаланиш йўналишлари бўйича келгуси йил учун Жамғарма даромадлари ва харажатлари прогнози Жамғарманинг ижро тувчи дирекцияси томонидан ишлаб чиқилади ва кўриб чиқиш учун Жамғармани бошқариш кенгашига киритилади.

18. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳар йили 15 июндан кечикмай Жамғармага жорий йил учун Жамғарма харажатларининг кутилаётган ижросини ва келгуси йил учун Жамғарма харажатлари прогнозини тақдим этади.

19. Ижро этувчи дирекция Жамғармани бошқариш кенгаши томонидан маълумланган даромадлар ва харажатлар прогнозини Ўзбекистон Республикаси Молия вазирлигига қонун ҳужжатларида белгиланган муддатларда тақдим этади.

20. Олий Мажлис сессиясида Ўзбекистон Республикаси Давлат бюджети

тасдиқлангандан, шунингдек келгуси йил учун Ўзбекистон Республикаси Давлат бюджети параметрлари тўғрисида Ўзбекистон Республикаси Вазирлар Маҳкамасининг қарори қабул қилингандан кейин Ижро этувчи дирекция беш кун муддатда:

Ўзбекистон Республикаси Давлат солиқ қўмитасига — келгуси йил учун тасдиқланган Жамғарма даромадларининг минтақалар бўйича асосий параметрларини;

Ўзбекистон Республикаси Меҳнат ва аҳолини ижтимоий муҳофаза қилиш вазирлигига — келгуси йил учун тасдиқланган Жамғарма харажатларининг турлар ва минтақалар бўйича асосий параметрларини (йўналишларини) етказди.

21. Жамғарма бюджетининг тасдиқланган кўрсаткичларини бажариш:

юридик ва жисмоний шахслардан мажбурий ажратмалар, бадаллар ва бошқа тўловларнинг тўлиқ йиғилиши ва тушиши бўйича — Давлат солиқ хизмати органлари томонидан;

ўз вақтида ва тўлиқ молиялаштириш, шунингдек Жамғарма маблағларидан мақсадли ва самарали фойдаланилишини назорат қилиш бўйича — Жамғарманинг ижро этувчи дирекцияси томонидан;

Жамғарма маблағларини белгиланган тартибда ўз вақтида тайинлаш, тўлаш ва аниқ манзилли сарфлаш бўйича — Ўзбекистон Республикаси Меҳнат ва аҳолини ижтимоий муҳофаза қилиш вазирлиги, унинг ҳудудий бошқармалари ва бўлимлари томонидан таъминланади.

VI. Жамғарманинг Ўзбекистон Республикаси Давлат солиқ қўмитаси ҳамда Меҳнат ва аҳолини ижтимоий муҳофаза қилиш вазирлиги билан ўзаро ҳамкорлиги

22. Ўзбекистон Республикаси Давлат солиқ қўмитаси ва унинг ҳудудий органлари қуйидагиларни таъминлайди:

мажбурий ажратмалар, бадаллар ва манбалар бўйича бошқа тўловларнинг тўғри ҳисобланиши, Жамғармага тўлиқ ва ўз вақтида тўланишини назорат қилиш;

Жамғармага мажбурий ажратмалар, бадаллар ва бошқа тўловларни тўловчилар бўйича ҳисобга олиб бориш;

юридик ва жисмоний шахслар томонидан Жамғармага мажбурий ажратмалар, бадаллар ва бошқа тўловларнинг тўғри ҳисобланишини, шунингдек Жамғарма билан ўзаро ҳисоб-китобларнинг ҳолатини текшириш;

мажбурий ажратмалар, бадаллар ва бошқа тўловларни ҳисоблаш тартибини ва тўлаш муддатларини бузганлик учун юридик ва жисмоний шахсларга нисбатан қонун ҳужжатларига мувофиқ молиявий ва маъмурий жавобгарлик чораларини қўлланиш;

бадалларни ҳар бир шахс бўйича ҳисобга олиш ҳамда меҳнат дафтарчалари юритиш учун ҳар чоракда тегишли ижтимоий таъминот бўлимларига юридик шахс бўлмасдан тадбиркорлик фаолияти билан шугулланувчи шахслар ҳамда деҳқон хўжаликлари аъзолари томонидан тўланган бадаллар миқдорлари тўғрисидаги маълумотларни тақдим этиш.

23. Ўзбекистон Республикаси Давлат солиқ қўмитаси Жамғарманинг ижро этувчи дирекциясига:

тушган мажбурий ажратмалар, бадаллар ва тўловлар тўғрисидаги, Жамғармага мажбурий ажратмалар, бадаллар ва бошқа тўловлар турлари бўйича қарзлар тўғрисидаги тезкор ҳисоботни ҳар ойда ҳисобот ойдан кейинги ойнинг 10-кунигача;

мажбурий ажратмалар, бадаллар ва бошқа тўловларни ҳисоблаш ва тўлаш тўғрисидаги ҳисоботни юридик шахслар томонидан йил чораги ва йиллик ҳисобот тақдим этилгандан кейин 15 кун мобайнида тақдим этади.

24. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ва унинг жойлардаги органлари:

пенсиялар, нафақалар ва компенсация тўловларини (компенсация тўловлари бўйича — бюджет ташкилотларидан ташқари) ўз вақтида тайинлайдилар ва тўлайдилар;

юридик шахс бўлмасдан тадбиркорлик фаолияти билан шуғулланувчи шахсларга, шунингдек улар томонидан ижтимоий суғурта бадаллари тўланган тақдирда деҳқон хўжалиги аъзоларига — вақтинча меҳнатга лаёқатсизлик, ҳомиладорлик ва туғиш нафақалари, бола туғилганда бериладиган нафақалар, дафн маросими нафақаларини ҳисоблайдилар ва тўлайдилар;

ишлайдиган пенсионерларга пенсиялар, вақтинча меҳнатга лаёқатсизлик, ҳомиладорлик ва туғиш нафақалари, бола туғилганда бериладиган нафақалар, дафн маросими нафақалари, 16 ёшгача бўлган ногирон боланинг ота-оналаридан бирига (васийга, ҳомийга) бир ойда бир қўшимча дам олиш кунни учун тўловлар, компенсация тўловлари тўлаш учун корхоналар, ташкилотлар ва муассасаларнинг харажатларини молиялаштирадилар;

«Фуқароларнинг давлат пенсия таъминоти тўғрисида»ги Ўзбекистон Республикаси Қонунининг 15-моддасига мувофиқ меҳнатда майиб бўлганлик ёки касб касаллиги оқибатидаги ногиронлик туфайли тайинланган пенсияларга тўланган маблағларни айбдор юридик ва жисмоний шахслардан регресс даъволар бўйича белгиланган тартибда ундириб оладилар;

юридик шахс бўлмасдан тадбиркорлик фаолияти билан шуғулланувчи шахслардан, шунингдек деҳқон хўжалиги аъзоларидан бадаллар тушишининг ҳисобини олиб борадилар;

юридик шахс бўлмасдан тадбиркорлик фаолияти билан шуғулланувчи шахсларнинг, шунингдек деҳқон хўжалиги аъзоларининг меҳнат дафтарчаларини юритадилар ва сақлайдилар;

Жамғарма маблағларини қонун ҳужжатларига мувофиқ мақсадли сарфлайдилар;

пенсиялар, нафақалар ва компенсациялар ўз вақтида ҳисобланиши ҳамда тўла-нишини таъминлаш масалалари бўйича жойлардаги давлат ҳокимияти органлари билан яқиндан ҳамкорлик қиладилар;

якка тартибдаги тадбиркорлар ва деҳқон хўжаликлари аъзоларига ижтимоий суғурта бўйича нафақалар олиш ҳуқуқини берувчи ҳужжатларнинг ишончлилигини текширадилар.

25. Ўзбекистон Республикаси Меҳнат ва аҳолини ижтимоий муҳофаза қилиш вазирлиги Жамғарманинг Ижро этувчи дирекциясига:

хар ойда ҳисобот ойдан кейинги ойнинг 10-кунигача минтақалар бўйича пенсиялар, нафақалар ва компенсациялар бўйича амалга оширилган тўловлар тўғрисида тезкор ахборот;

тасдиқланган шакл бўйича юридик шахсларнинг йил чораги ва йиллик ҳисоботи тақдим этилгандан кейин 15 кун мобайнида маблағлардан фойдаланилиши тўғрисида ҳисобот тақдим этади.

26. Мажбурий ажратмалар, бадаллар ва бошқа тўловларни мустақил тўловчи юридик ва жисмоний шахслар:

қонун ҳужжатларида белгиланган миқдорда ва тартибда мажбурий ажратмалар, бадаллар ва бошқа тўловларни ҳисоблайдилар ва Жамғарманинг ҳисоб рақамига тўлайдилар;

Жамғарма маблағлари бўйича давлат солиқ хизмати органларига ҳисобот бе-

ришнинг белгиланган шакллари ишончилиги ва ўз вақтида тақдим этилишини таъминлайдилар.

Бундан ташқари, юридик шахслар қонун ҳужжатларида белгиланган тартибда иш жойи бўйича тўланадиган Жамғарма маблағларининг мақсадли сарфланишига қатъий риоя этилишини таъминлайдилар.

VII. Жамғарма даромадларини шакллантириш манбалари ва тартиби

27. Жамғарма даромадлари қуйидаги манбалар ҳисобига шакллантирилади:

а) мажбурий ажратмалар ва бадаллар:

мулкчилик шаклларида қатъи назар, юридик шахсларнинг меҳнатга ҳақ тўлаш фондидан ягона ижтимоий тўлов тушумларининг белгиланган миқдори;

алоҳида юридик шахсларнинг ижтимоий суғурта бадаллари;

юридик шахс бўлмасдан тадбиркорлик фаолияти билан шуғулланувчи жисмоний шахсларнинг ижтимоий суғурта бадаллари;

фуқароларнинг иш ҳақидан суғурта бадаллари;

қўшилган қиймат солиғи ва акциз солиғи чиқариб ташланган ҳолда корхоналар, муассасалар ва ташкилотларнинг товарлар сотиш (ишлар, хизматлар кўрсатиш) ҳажмидан ажратмалари. Бунда узоқ муддатли активлар ва ўзи фойдаланилган бошқа мол-мулкни сотиш мажбурий маблағ ажратиш объектига киритилмайди.

б) бошқа тўловлар:

«Фуқароларнинг давлат пенсия таъминоти тўғрисида»ги Ўзбекистон Республикаси Қонунининг 15-моддасига мувофиқ тайинланган меҳнатда майиб бўлганлик ёки касб касаллиги оқибатида ногирон бўлганларга пенсия тўлаш харажатларини қоплаш учун регрессив талаблар (даъволар) бўйича иш берувчилар ва фуқаролардан ундириладиган маблағлар;

«Фуқароларнинг давлат пенсия таъминоти тўғрисида»ги Ўзбекистон Республикаси Қонунининг 14-моддасига мувофиқ муддатидан олдин тайинланган пенсияларни тўлаш харажатларини қоплаш учун ўтказиладиган Ўзбекистон Республикаси Меҳнат вазирлигининг Иш билан таъминлашга кўмаклашиш жамғармаси маблағлари;

«Фуқароларнинг давлат пенсия таъминоти тўғрисида»ги Ўзбекистон Республикаси Қонунининг 12-моддасига мувофиқ тайинланган имтиёзли пенсияларни тўлаш харажатларини қоплаш учун ўтказиладиган корхоналар, муассасалар ва ташкилотлар маблағлари;

деҳқон хўжаликлари аъзоларининг ихтиёрий равишда тўланадиган суғурта бадаллари;

ҳисобланган жарималар суммаларининг бир қисми, қонун ҳужжатларига мувофиқ солиқ органларини ривожлантириш жамғармасига ундириладиган суммалардан ташқари, мажбурий ажратмалар, бадаллар ва бошқа тўловлар ўз вақтида тўланмаганлиги учун пенялар;

корхона тугатилганда, меҳнат вазифаларини бажариш билан боғлиқ ҳолда майиб бўлган, касб касаллигига учраган ёки соғлиғига бошқача шикаст етказилган ходимга зарарни қоплаш учун тўланадиган суммалар;

қонун ҳужжатларида тақиқланмаган бошқа манбалар, шу жумладан ихтиёрий бадаллар маблағлари, хорижий инвестициялар ва кредитлар.

28. Мажбурий ажратмалар, бадаллар ва бошқа тўловларни ўтказиш Жамғарманинг банкларда бюджетдан ташқари Пенсия жамғармаси даромадларининг белгиланган таснифларига мувофиқ тушумларнинг ҳар бир тури бўйича очилган тегишли транзит ҳисоб рақамларига ўтказилади.

29. Ягона ижтимоий тўлов юридик шахслар томонидан тегишли туман (шаҳар) солиқ органлари учун хизмат кўрсатувчи банкларда очилган транзит ҳисоб рақамларига ҳисобланган сумманинг тўлиқ миқдоридан ўтказилади. Тушган маблағлар ҳар куни хизмат кўрсатувчи банклар томонидан белгиланган нормативлар бўйича тақсимланади ва тегишли равишда Жамғарма, Иш билан таъминлашга қўмаклашиш жамғармаси, Ўзбекистон Касаба уюшмалари Федерацияси Кенгаши ҳисоб рақамларига ёзилади.

30. Юридик ва жисмоний шахслар томонидан тўланадиган бошқа мажбурий ажратмалар, бадаллар ва бошқа тўловлар уларга хизмат кўрсатадиган тижорат банклари орқали туман (шаҳар) солиқ органларига хизмат кўрсатадиган банкларда очилган Жамғарманинг транзит ҳисоб рақамларига белгиланган тартибда ўтказилади.

31. Туман (шаҳар) солиқ органлари учун очилган транзит ҳисоб рақамларига тушган маблағлар ҳар куни, иш куни охирида тижорат банклари томонидан Марказий банкнинг Қорақалпоғистон Республикаси, вилоятлар ва Тошкент шаҳар бош бошқармаларида очилган Жамғарманинг транзит ҳисоб рақамига ўтказилади.

32. Марказий банкнинг Қорақалпоғистон Республикаси, вилоятлар ва Тошкент шаҳар бош бошқармаларидаги Жамғарманинг транзит ҳисоб рақамларига тушган маблағлар шу куннинг ўзидан ушбу банклар томонидан Ўзбекистон Республикаси Молия вазирлиги ҳузуридаги бюджетдан ташқари Пенсия жамғармасининг Ўзбекистон Республикаси Марказий банкида очилган ягона йиғма ҳисоб рақамига автоматик режимда ўтказилади.

VIII. Пенсиялар, нафақалар ва тўловларни молиялаштириш тартиби

33. Жамғарма маблағлари:

а) ишламайдиган фуқароларга:

ижтимоий таъминот бўлимлари томонидан тайинладиган пенсиялар;
болалиқдан ногиронларга, давлат пенсия таъминоти олиш ҳуқуқига эга бўлмаган кекса ва меҳнатга лаёқатсиз фуқароларга нафақалар;
қонун ҳужжатларига мувофиқ Жамғарма маблағларидан молиялаштирилдиган бошқа компенсация тўловлари тўлаш учун;

б) ишлайдиган фуқароларга:

ижтимоий таъминот бўлимлари томонидан тайинладиган пенсиялар;
вақтинча меҳнатга лаёқатсизлик нафақалари;
хомиладорлик ва туғиш нафақалари;
бола туғилганда берилдиган нафақалар;
дафн маросими нафақалари;
16 ёшгача бўлган ногирон боланинг ота-оналаридан бирига (васийга, хомийга) бир ойда бир қўшимча дам олиш куни учун тўловлар;
қонун ҳужжатларига мувофиқ Жамғарма маблағларидан молиялаштирилдиган бошқа компенсация тўловлари учун сарфланади.

34. Ишламайдиган ва ишлайдиган фуқароларга пенсиялар, нафақалар ва компенсация тўловларини молиялаштириш учун Ўзбекистон Республикаси Меҳнат ва аҳолини ижтимоий муҳофаза қилиш вазирлиги ва унинг жойлардаги органлари томонидан алоҳида ҳисоб рақамлари очилади.

35. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ишламайдиган ва ишлайдиган фуқароларга пенсиялар, нафақалар ва компенсация тўловлари учун маблағларга бўлган эҳтиёж миқдорини тўлов тўланади-

ган ҳар бир ойнинг 10-кунигача аниқлайди ва Ижро этувчи дирекцияга буюртманома беради.

36. Жамғарманинг Ижро этувчи дирекцияси Жамғарма маблағларини Меҳнат ва аҳолини ижтимоий муҳофаза қилиш вазирлигининг ҳисоб рақамига ўтказиш йўли билан:

жорий тўлов ойининг 5-кунигача ўтган ойнинг эҳтиёжи ҳисоб-китобининг 40 фоизи миқдоридagi суммани;

жорий тўлов йилининг 20-кунигача амалдаги эҳтиёжнинг тақдим этилган миқдоридан қолган суммани сарфлайди.

37. Ўзбекистон Республикаси Меҳнат ва аҳолини ижтимоий муҳофаза қилиш вазирлиги, ўз навбатида, икки банк куни мобайнида тегишли маблағларни Қорақалпоғистон Республикаси Меҳнат ва аҳолини ижтимоий муҳофаза қилиш вазирлиги ҳамда вилоятлар ва Тошкент шаҳар меҳнат ва аҳолини ижтимоий муҳофаза қилиш бош бошқармаларининг ҳисоб рақамларига ўтказди, улар буюртманомалар асосида маблағларни туман (шаҳар) ижтимоий таъминот бўлимларига белгиланган тартибда ва муддатларда ўтказди.

Туман (шаҳар) ижтимоий таъминот бўлимлари, ўз навбатида, тушган маблағларни пенсиялар, нафақалар ва компенсацияларни тўлаш учун «Ўзбекистон почтаси» очик акциядорлик жамияти ва Халқ банкининг туман ва шаҳар бўлимлари ҳисоб рақамларига ўтказадилар.

Туман (шаҳар) ижтимоий таъминот бўлимлари корхоналар, ташкилотлар ва муассасаларнинг буюртманомалари бўйича ишлайдиган пенсионерларга пенсиялар, вақтинча меҳнатга лаёқатсизлик нафақалари, ҳомиладорлик ва туғиш нафақалари, бола туғилганда бериладиган нафақалар, дафн маросими нафақалари, 16 ёшгача бўлган ногирон болаларнинг ота-оналарига қўшимча дам олиш куни учун ҳақ тўлаш, берилётган имтиёзлар ўрнига компенсация тариқасидаги пул тўловлари (бюджет ташкилотларидан ташқари) маблағларини молиялаштирадилар.

38. Жамғарманинг ҳисоб рақамларидан маблағларни қонун ҳужжатларида, шунингдек мазкур Низомда назарда тутилмаган мақсадларда ўтказиш ва вақтинча олиб қўйиш тақиқланади.

IX. Жамғарма маблағлари шакллантирилиши ва улар сарфланиши ҳисоби юритилиши учун жавобгарлик

39. Ўзбекистон Республикаси Давлат солиқ қўмитаси ва унинг жойлардаги органлари Жамғармага тасдиқланган даромадлар прогнозига мувофиқ тушумларнинг ўз вақтида ва тўлиқ тушиши учун жавоб берадилар.

40. Жамғарманинг Ижро этувчи дирекцияси пенсиялар, нафақалар ва компенсациялар тўлаш учун назарда тутилган Жамғарма маблағларининг ўз вақтида ва тўлиқ молиялаштирилиши учун жавоб беради.

41. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда унинг ҳудудий органлари Жамғарма маблағларидан қатъий мақсадли фойдаланилиши учун жавоб берадилар.

42. Жамғармага мажбурий ажратмалар, бадаллар ва бошқа тўловларнинг ҳисобланиши ва ўз вақтида тўланиши учун жавобгарлик тўловчилар — юридик шахсларга юкланади, улар:

мазкур Низомда белгиланган тартибда мажбурий ажратмалар, бадаллар ва бошқа тўловларнинг тўғри ҳисобланишини ва ўз вақтида тўланишини таъминлашга;

иш жойи бўйича тўланадиган Жамғарма маблағлари сарфи учун жавоб беришга;

қонун ҳужжатларида белгиланган тартибда давлат солиқ хизмати органлари ходимларини Жамғармага тўловлар ва мажбурий ажратмалар ҳисобланиши ва тўланишининг тўғрилигини текшириш учун қўйишга, уларнинг талабига кўра ушбу тўловлар ва мажбурий ажратмаларнинг ҳисобланиши ва тўланиши билан боғлиқ зарур ҳужжатлар ва маълумотларни тақдим этишга мажбурдирлар.

43. Пенсиялар, нафақалар ва компенсацияларни тўлайдиган корхоналар, ташкилотлар ва муассасалар Жамғарма маблағларининг ўз вақтида ва мақсадли тўланиши учун жавоб берадилар.

44. Ижтимоий суғурта бўйича бадалларни мустақил тўлайдиган юридик ва жисмоний шахслар Жамғармага мажбурий ажратмалар, бадаллар ва бошқа тўловларнинг тўғри ҳисобланиши ва ўз вақтида тўланиши учун жавоб берадилар.

45. Жамғарманинг Ижро этувчи дирекцияси Ўзбекистон Республикаси Молия вазирлигига белгиланган муддатларда чораклик ва йиллик бухгалтерия ҳисоботи тақдим этади.

46. Жамғармага муддатида тўланмаган мажбурий ажратмалар, бадаллар ва бошқа тўловларни ундириб олиш Ўзбекистон Республикаси қонун ҳужжатларида белгиланган тартибда амалга оширилади.

47. Маблағлар Жамғарманинг транзит ҳисоб рақамларига ортиқча ёки янглиш ўтказилган тақдирда ушбу маблағларни мазкур тўловчининг Жамғармага бошқа тўловлари ҳисобига ҳисоблаш солиқ тўловчининг ёзма аризасига биноан тегишли туман (шаҳар) солиқ органи томонидан тайёрланган тўлов топшириқномаси асосида, тўловнинг бир тури бўйича ортиқча тўловни бошқа тўлов тури бўйича муддатида тўланмаган қарз тўлови ҳисобига ўтказиш йўли билан амалга оширилади.

48. Жамғарманинг транзит ҳисоб рақамларига ортиқча ёки янглиш ўтказилган маблағларни қайтариш солиқ тўловчининг ёзма аризаси асосида, қонун ҳужжатларида белгиланган муддатда тегишли туман (шаҳар) солиқ органи томонидан амалга оширилади.

Х. Жамғарма маблағлари тўғри ҳисобланиши, тўланиши ва сарфланиши устидан назорат қилиш

49. Пенсиялар, нафақалар ва компенсацияларни тўлашда Жамғарма маблағларининг тўғри ҳисобланиши, тўланиши ва фойдаланилишини назорат қилиш юридик шахсларнинг раҳбарлари ва бош бухгалтерлари томонидан амалга оширилади.

50. Юридик ва жисмоний шахслар томонидан амалга ошириладиган мажбурий ажратмалар, бадаллар ва бошқа тўловларнинг тўғри ҳисоб-китоб қилиниши, тўлиқлиги ва ўз вақтида тўланишини назорат қилиш давлат солиқ хизмати органлари томонидан амалга оширилади.

51. Иш жойи бўйича корхоналар, ташкилотлар ва муассасалар томонидан Жамғарма маблағларининг мақсадли сарфланишини назорат қилиш давлат солиқ хизмати органлари томонидан Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда унинг маҳаллий органлари билан биргаликда оширилади.

52. Пенсиялар, нафақалар ва компенсация тўловларининг тўғри тайинланиши ва тўланишини назорат қилиш Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда унинг жойлардаги органлари томонидан амалга оширилади.

53. Пенсиялар, нафақалар ва компенсациялар тўлови харажатлари, шунингдек корхоналар, ташкилотлар ва муассасаларнинг ижтимоий суғурта бўйича харажат-

лари ўз вақтида молиялаштирилиши мониторинги Жамғарманинг Ижро этувчи дирекцияси томонидан амалга оширилади.

54. Жамғарма маблағларининг мақсадли ва самарали сарфланишини назорат қилиш Жамғарма маблағларидан фойдаланилишини назорат инспекцияси томонидан амалга оширилади.

Назорат функциялари Жамғарма маблағларидан фойдаланилишини назорат қилиш инспекцияси томонидан Назорат қилувчи органлар фаолиятини мувофиқлаштириш республика кенгашининг қўшимча розилигисиз амалга оширилади. Бунда кўрсатиб ўтилган текширишлар тасдиқланган режалар ва Ўзбекистон Республикаси Молия вазирининг буйруқлари билан амалга оширилади.

55. Ўзбекистон Республикаси Меҳнат ва аҳолини ижтимоий муҳофаза қилиш вазирлиги, «Ўзбекистон почтаси» очиқ акциядорлик жамияти ва Халқ банки бўлинмалари томонидан Жамғарма маблағларидан мақсадли фойдаланилишини назорат қилиш Молия вазирлигининг Назорат-тафтиш бош бошқармасига ва унинг ҳудудий бўлинмаларига юкланади.

Вазирлар Маҳкамасининг
2004 йил 21 октябрдаги 490-сон қарорига
4-ИЛОВА

Ўзбекистон Республикаси Ҳукуматининг ўз кучини йўқотган қарорлари

1. Вазирлар Маҳкамасининг «Ўзбекистон Республикаси пенсия таъминоти тизимини такомиллаштириш чора-тадбирлари тўғрисида» 2000 йил 15 ноябрдаги 444-сон қарори (Ўзбекистон Республикаси ҚТ, 2000 й., 11-сон, 71-модда).

2. Вазирлар Маҳкамасининг «Бюджетдан ташқари Пенсия жамғармаси маблағларини шакллантириш ва сарфлаш тартиби тўғрисидаги низомни тасдиқлаш ҳақида» 2000 йил 23 декабрдаги 498-сон қарори (Ўзбекистон Республикаси ҚТ, 2000 й., 12-сон, 80-модда).

3. Вазирлар Маҳкамасининг «Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда Ташқи меҳнат миграцияси масалалари агентлиги тўғрисидаги низомларни тасдиқлаш ҳақида» 2001 йил 6 апрелдаги 162-сон қарорига 3-илованинг 34 ва 36-бандлари (Ўзбекистон Республикаси ҚТ, 2001 й., 4-сон, 21-модда).

БЕШИНЧИ БЎЛИМ

ЎЗБЕКИСТОН РЕСПУБЛИКАСИ МОЛИЯ ВАЗИРИНИНГ
БУЙРУҒИ

449 Қорақалпоғистон Республикаси бюджети ва маҳаллий бюджетларда назарда тутилган режали йиллик даромадлар ва харажатлар ҳажмларининг чораклик тақсимотини тузиш, бюджетни ижро этиш жараёнида киритиладиган ўзгартиришларни ҳисобга олиш, бюджетда назарда тутилган ташкилотлар ва тадбирларни молиялаштириш тартиби тўғрисидаги йўриқномага ўзгартириш ва қўшимчалар киритиш ҳақида

*Ўзбекистон Республикаси Адлия вазирлиги томонидан 2004 йил
20 октябрда 1025-2-сон билан давлат рўйхатидан ўтказилди*

(2004 йил 30 октябрдан кучга киради)

Ўзбекистон Республикасининг «Бюджет тизими тўғрисида»ги Қонуни ва Ўзбекистон Республикаси Вазирлар Маҳкамасининг 1992 йил 23 ноябрдаги 553-сонли қарори билан тасдиқланган Ўзбекистон Республикаси Молия вазирлиги тўғрисидаги низомга асосан, **буюраман:**

1. Ўзбекистон Республикаси Молия вазирлигининг 2001 йил 26 мартда 29-сон буйруғи билан тасдиқланган Қорақалпоғистон Республикаси бюджети ва маҳаллий бюджетларда назарда тутилган режали йиллик даромадлар ва харажатлар ҳажмларининг чораклик тақсимотини тузиш, бюджетни ижро этиш жараёнида киритиладиган ўзгартиришларни ҳисобга олиш, бюджетда назарда тутилган ташкилотлар ва тадбирларни молиялаштириш тартиби тўғрисидаги йўриқномага (2001 йил 12 апрел, рўйхат рақами 1025 — Меъёрий ҳужжатлар ахборотномаси, 2001 йил 7-8-сон) ўзгартириш ва қўшимчалар иловага* асосан киритилсин.

2. Мазкур буйруқ Ўзбекистон Республикаси Адлия вазирлигида давлат рўйхатидан ўтказилган кундан бошлаб, ўн кун ўтгандан сўнг, кучга киритилсин.

Молия вазири С. РАҲИМОВ

Тошкент ш.,
2004 йил 12 октябрь,
111-сон

* Илова рус тилидаги матнда берилди.

ЎЗБЕКИСТОН RESPUBLIKACI MАРКАЗИЙ БАНКИ БОШҚАРУВИНИНГ
ҚАРОРИ**450** Ўзбекистон Республикаси ҳудудида банкларда электрон ахборотларни муҳофазалашни ташкил этиш тўғрисидаги йўриқномага қўшимчалар киритиш ҳақида

*Ўзбекистон Республикаси Адлия вазирлиги томонидан 2004 йил
22 октябрда 1047-1-сон билан давлат рўйхатидан ўтказилди*

(2004 йил 1 ноябрдан кучга киради)

Ўзбекистон Республикасининг «Ўзбекистон Республикасининг Марказий банки тўғрисида»ги Қонуни 7 ва 51-моддаларига мувофиқ ва Ўзбекистон Республикаси банк тизимини ягона вакиллик ҳисоб рақами режимига ўтиб ишлаши ва банк телекоммуникация тармоғи муҳофазасини таъминлаш муносабати билан Ўзбекистон Республикаси Марказий банк Бошқаруви **қарор қилади:**

1. Марказий банк Бошқаруви томонидан 2001 йил 23 июнда тасдиқланган 492-сонли «Ўзбекистон Республикаси ҳудудида банкларда электрон ахборотларни муҳофазалашни ташкил этиш тўғрисида»ги Йўриқномага (2001 йил 9 июль, рўйхат рақами 1047 — Меъерий ҳужжатлар ахборотномаси, 2001 йил 13 сон) иловага мувофиқ қўшимчалар киритилсин.

2. Ушбу қарор Ўзбекистон Республикаси Адлия вазирлигида давлат рўйхатидан ўтказилган кундан 10 кун ўтгач кучга киритилсин.

Марказий банк Бошқаруви раиси в.в.б. М. ЖУМАГАЛДИЕВ

Тошкент ш.,
2004 йил 2 октябрь,
21/10-сон

Марказий банки Бошқарувининг
2004 йил 2 октябрдаги 21/10-сонли қарорига
ИЛОВА

Ўзбекистон Республикаси ҳудудида банкларда электрон ахборотларни муҳофазалашни ташкил этиш тўғрисидаги йўриқномага киритилаётган қўшимчалар

Йўриқнома қуйидаги таҳрирдаги янги бандлар билан тўлдирилсин:

«11¹. Банк телекоммуникация тармоғи орқали давлат сири тоифасига кирувчи маълумотлар узатилиши қатъиян ман этилади.

11². Марказий банк фармойиши ва мувофиқлаштирилган режа-жадвали асосида тижорат банкларида амалга оширилаётган текширишлар ва ўрганишлар вақтида, текширувчиларга қоғоз ҳужжатлар билан бир қаторда электрон маълумотлардан (электрон ҳужжатлар, электрон база, электрон архив) ҳам банк биносидан олиб чиқиб кетмаслик шарти билан фойдаланишга рухсат этилади».

Ўзбекистон Республикаси
Адлия вазирлиги маълум қилади:
вазирликлар, давлат қўмиталари ва идораларининг
умумий мажбурий тусдаги меъёрий ҳужжатларини давлат
рўйхатидан ўтказиш ҳолати тўғрисида
2004 йил 16 октябрдан 22 октябргача бўлган маълумот

I. Давлат рўйхатидан ўтказилди:

1. «Қорақалпоғистон Республикаси бюджети ва маҳаллий бюджетларда назарда тутилган режали йиллик даромадлар ва харажатлар ҳажмларининг чораклик тақсимотини тузиш, бюджетни ижро этиш жараёнида киритиладиган ўзгартиришларни ҳисобга олиш, бюджетда назарда тутилган ташкилотлар ва тадбирларни молиялаштириш тартиби тўғрисидаги йўриқномага ўзгартириш ва қўшимчалар киритиш ҳақида» *Ўзбекистон Республикаси Молия вазирининг 2004 йил 12 октябрдаги 111-сон буйруғи.*

2004 йил 20 октябрда 1025-2-сон билан рўйхатдан ўтказилди (2004 йил 30 октябрдан кучга киради).

2. «Ўзбекистон Республикаси ҳудудида банкларда электрон ахборотларни муҳофазалашни ташкил этиш тўғрисидаги йўриқномага қўшимчалар киритиш ҳақида» *Ўзбекистон Республикаси Марказий банки Бошқарувининг 2004 йил 2 октябрдаги 21/10-сон қарори.*

2004 йил 22 октябрда 1047-1-сон билан рўйхатдан ўтказилди (2004 йил 1 ноябрдан кучга киради).

Кучини йўқотган деб эътироф этилди ва ижродан
чақириб олинди:

1. Ўзбекистон Республикаси Давлат солиқ қўмитаси ва Марказий банкининг 2004 йил 12 августдаги 22-6971, 17-29/1158-сонли қўшма хати.

Ушбу ҳужжат Ўзбекистон Республикаси Адлия вазирлигида давлат рўйхатидан ўтказилмаган ҳамда амалдаги қонунчиликка зид ҳужжат сифатида кучини йўқотган деб эътироф этилди ва ижродан чақириб олинди.